



TAPAK 7

2016 küm Adele-i million £40 aazük

TAPAK 9

Sonia Gandhi-i Mulayam aser Lalu na den Tir election atema jemb



VOL. XIV NO. 195 (ADOK 195)

DIMAPUR

FRIDAY

MAY 05, 2017

5.00

## CM-i mangyimba osang lemsatep

**Kohima, May 05 (TYO):** Bodhbar aonung Nagaland Minister, Imkong L. Imchen tetsü, Wt. Tsüpongchila asüba osang angashia Chief Minister, Dr. Shürhozelie Liezietsu-i pa den mangyim osang lemsatepogo.

Chief Minsiter-i, "Yasüng la asüba osang angashia ni mangyimer. La dak sasapela aser anepalu liasü, aser la meteta alirtembo ajaki la meima liasü," ta ashi.

"Lar chirnurtem sorkar mapa balala nung temaba jenjang nung aliba aser maneni state aser loktiliba nung tongtibang shilem agibaji ajanga lai lar chinurtem

koma anitet, iba kuliji sayur. Tamanger rongnung mezüngpurtem ama la tamangdir ka liasü, aser la alima nungi pilaba ajanga tanü lar zünger ishika, akumlrtem rongjentsü," ta mangyim osang nungsa shia lir.

"Ni, Nagaland sorkar tenüng nung na aser ner kibong züngsemtem den asüko mangyim lemsateper aser ajak takoksang Tsüngremi iba ama mangyim mapang nung nü nem tesüneptsüba tanela agüjang ta sarasademtsür. Ano asür nema tatem maka tesünap agüjang ta ni sarasademtsür," ta Chief Minister-isa ashi.

## State nung Technical Services training agir

**Kohima, May 04 (TYO):** State nung tang mezüngbuba technical services atema induction training May 04, 2017 nü Multipurpose Hall, ATI nung tenzüko, aser iba sentong nung tetushi tejaokerji Nagaland Chief Secretary, Pankaj Kumar, IAS liasü.

Iba sentong nung jembidang ATI Director, Lithrongla G. Chishi, IAS-i, iba training programme ya Chief Secretary-i benokba project ka lir ta metetdaksüba den külemi technical services atema training atangji nung katetba atema lai Chief Secretary nem tenüngsang agütsü.

Training balala, talisa state nung technical training agütsütettsüsa shisaliok agütsürtem agi anüngba atema tesasaba olen ka nung lai Heads of Departments ajak dang ketdangsertem yoka ATI indang training balala nungittsü ajungshi.

ATI-i department aser lenla balala nungi züngsemtem nem training agütsüba khuret abentsü, ta shia lai, iba induction programme ya ajanga sorkar mapa inyakertem takoktet adokdakja state nungdak peritsü

imlar, ta ashi. Tebilemba onük ka lemsatepdang lai, P&AR Dept-i Dept. ajak dang NPSC tatidang ajanga ketdangsertem shimtsü metetdaksütsüla, ta ashi.

Iba sentong nung Chief Secretary-ia, iba induction training ajanga ketdangsertemi inyaktsü shilem aser parnok dang nungi imlaba mapatem parnoki angatettsü, ta ashi.

Paisa, iba ya ajanga parnoki angazükba aser field nung teinyaktsü na tsüngda angatettsü, ta ashi.

Common induction programme teratet metetdaksüdüng pai, item ama programme ajanga ketdangsertem tsüngda tesendaktep yangluba nung yaritsü, aser ibaji ajanga dept balala tsüngda amalitep ajungkettsü, ta ashi.

"Iba training ya ajanga training agirtemi ozüng, telatetbatem aser inyakym balala rajema akumtsü," ta paisa shisem.

Iba sentong ya Additional Director (Admn) ATI, Kevekha Kevin Zehol, NCS leniba nung agi aser paisa training agirtem pelaa agizüka liasü.

## Alu nung metsü aser mozü mamshitsüla: Samir Bordoloi



**Brehostibar nikongdang Agri Scientist & Farmer Samir (Tsüngkotep tula semer alisang) den Organic chiyongtsü züsentettsü aser achitsü rongdak nungdakba indang shisalemsateper külen DABA Elim hall nung Pastor Toshi aser Youth Director Jungshi na dena teintet lanurtem noksa agiba angur.**

**Dimapur, May 04 (TYO):** Tanü asenoki bazaar nung alia achiba aonsutsü, süngjanglijang, shi aser ango ajunga ya mozü amshia züsentetba aser metsüba chiyongtsütem lir, anungji temang asoshi item mozütemji miim lir, ta tanü Dimapur nung Aor teintet lanurtem den sensaksemdang Assam nung Agri scientist aser aluyimer, Samir Bordoloi metetdaksü.

Chiyongtsü tekaratiba nung züsentettsü, topur junga angutsü aser mapang talangka tamajung mekümi ayutsü asoshi mozü tapu balala amshir aser item mozütemji chiyongtsü nungji keta adoker, anungji itemji temang asoshibo miim kümadoker, ta paisa metetdaksü.

Ibayongji, tanübo nisung shiai chiyongtsü pei peribo peisasa züsentettsü merangtsüla, ta Samir-

isa ajungshi.

Iba shisalemsatepba mapang aluyimertemi alu nung ayi südaksütsü asoshi metsü amshiba ajanga takoksa adoker asü ta asüngdang dang, "Hau, metsü jagi ali temo raksatsür, anungji tanaben alu ayimandangbo majungtsü. Ali ya asenok meyong masü saka asen chirnurtem dang nungi khen apua amshirba dang lir, anungji parnok nem meyipa agütsü dang ali temo shitak keta ali tajung agütsütsüla," ta Samir-isa metetdaksü.

Paisa ashiba agi, Naga lima nung mozü aketba süngolio aser aonsutsü tajung aika lir, anungji itemji mozü mamshii züsenteta achitsü aser ayoktsü sentong yanglu tenzütsüla.

Ali temo melena mozü amshiba anendaksünüa ashidang, asenoki asen temeket nung aliba süngolio

ya bendena ali kiya amshia ali temo yanglutsüla. Ali kiyyi ya tanga len nungi bener aruba alia mamshiyonga somomodong anasa angutsü aser ali temo yanglutsüba ya senotsü endoka masü saka süngküm aser aou agi atsüdang yanglubasa tajungba ta paisa ashi. Asenoki süngolio bendena shirepdaksüba ali temoji seret oa sen tasak agi tangari alir, ta Samir-isa metetdaksü.

Paisa asenoki tsünüba aonsutsütem agi chiyongtsü tamen küma yanglur tangaleni bener yoktsü sentong yanglua inyaktsü atema mozü mamshii aluyimba nung temulung agütsütsü mapang tongogo, ta paisa metetdaksü.

Farmer Samir Bordoloi tesem balala nung aluyimertem dang masü saka kaketeju nung kaketshirtem ajurua shisalemsatepa jajadagi.

## J&K, Shopian nung telungpurtemi ka khaset, ana yirutsü

**Srinagar, May 04 (Agencies):** Brihostibarnü Jammu & Kashmir, Shopian district nung telungpurtemi army tem gari amakdang gari anisang (civilian) ka khaset aser sepaia ana yirutsüogo. Iba tatalokba sülen tang

Shopian district nung security sepaitem aser telungprtem tsüngda teraradak lir, ta osang ka ajanga metetdaksü.

Yashia Jammu & Kashmir, Kulgam district nung Hizbul telungpurtemi police pongu

densema nisung tenet khaseta liasü.

Yashi amakba dak sendakba nung Hizbul Mujahideen telungpur, Umer Majid indang osang agütsüteter nem senpet lakh 10 agütsütsü police-i sangdongogo.

## Eros Colony nung kilentzü atangba ajanga nüburtem timtemdar

**Dimapur, May 04 (TYO):** Dimapur nung Eros Colony kübok Hong Kong Market, MP Road Deluxe point, Elora Line aser Blue Hill station nung kilentzü aoba tongti 'culvert' atangba ajanga item kiyong nung aliba ki aser dokantem nung tziü atsinga nisung alitsü mejungi kümogo, ta ECC Chairman, Badu Angami, ECC Secretary, Dietho Rhakho aser Gov't GB, ECC, Victo Yeptho nungeri külem sangdong ka nung metetdaksü.

Iba ya ajanga kibong teranati pei ki toktsütsüsa akum aser tang kibong 35 iba timtem agi kongshia lir, ano maneni tzüngluruwa mapang nung kibong aika kongshitsü, ta parnoki ashi.

Tesüiba kümtem nunga tim ketdangsertem dang iba timtem



metetdakja liasü, ajisüaka senotsü agi anüngba ajanga kecha meinyaktet.

Ajisüaka tang tamajungba akumba agi kilentzü aoba tesemtem tanga alibaji merüktettsü atema Colony Council-i mera agia inyakdar.

Iba maparen ya Council-i tajungtiba agi item kibongtem teyari agia inyakdar, ajisüaka tongti tetsükdaksüji- highway lenmang tur culvert tejen nung Hume pipes inoktsü mapa lir.

Joko hopta tasembuba iba mapa inyakba ajanga nüburtem aser gari senzüsembongba nung timtem agütsüdar, aser iba dak sendakba nung council-i ajak dang aremzüka atatsü mepishia metetdaksü.

Iba den külemi Council-isa kiyongertem aser dokan

kiburtem danga kilentzü aodak jana meindoktsü mepishia metetdaksüogo.

Eros Colony Council-isa Dimapur D.C-i tang teinyakdak maparen atema sen 50,000 tenla agütsüba den külemi iba maparen atema temaba ketdangsertem den jembitsü ta metetdaksüba atema pelaba lemsatep.

Administrative Officer DMC-i JCB den DMC aayangertem nübu agütsüba, E.E Highways den SDO-i item tesemtem reprangba sülen lenmang atutsü melaba den nungdakba hume pipe agütsütsü nangzüka aser Staff State Disaster Management Authority-i tesem semdanga nungdakba maparen inyakba atema pelar, ta kasa sangdong nung shia lir.

## CRBC Zunpha nung tube well nungshilong semzüksü



Dimapur, May 04, 2017: May 03, 2017 nü Geology & Mining Director, Wanhang Rengma-i CRBC Centre Zunpha, Tseminyu Sub division nung tang tasen semzükba Deep Tube Well nungshilong semzüksüba sülen tangokba noksa nung angur.

**Dimapur, May 04 (TYO):** May 03, 2017 nü Geology & Mining Director, Wanhang Rengma-i CRBC Centre Zunpha, Tseminyu Sub Division nung tang tasen semzükba Deep Tube Well nungshilong semzüksü.

Iba sentong nung Executive Secretary CRBC, Haiwalo Apon-a dena liasü.

Nungshilong semzüksüba sülen CRBC conference hall nung Secretary Development CRBC, Arhunlo Semp leniba nung sentong tatsüka agia liasü.

Iba sentong nung jembidang Wanhang Rengma-i par Department-i CRBC Centre nung Tube Well takok nuga

inyaktetba atema Tsüngrem nem tenüngsang agütsü.

Ano Executive Secretary CRBC, Haiwalo Apon-i, CRBC Centre nung Tube Well yanglutetba ya tamalen pa (Director G&M) inyakdang benokba lir, ta metetdaksü.

Director-isa Geology & Mining Department nung ketdangsertem aser staff temi Nagaland nung tenem tesemtem nung 'Ground water' bushiba aser constructions mapatem nendaka inyakba atema pelaba lemsatop.

Deep Tube Well yangluba indang osang Khikiya Kath Geologist-i metetdaksü.

(Geology & Mining) for Ground Water Cell Jt. Director, S. Manen Ao-i Nagaland nung Ground water indang jembidang pai, Geology & Mining department-i state nung Deep Tube Well 200 yangluogo, ta metetdaksüba den külemi paisa, 2017-18 küm nungsa department-i ano Deep Tube Well trok-tenet shi yanglutsü, ta shisem.

Haiwalo Apon Secretary CRBC-i tepela anküp o jembia aser Rev. Isac Kesen Secretary M & E CRBC o Shani Kath Secretary Women CRBC nati tetenzük aser tetem sarasadem agia liasü.

## NSCW-i ayonga Human Trafficking legal awareness kaogo

**Dimapur, May 04 (Agencies):** Nagaland State Commission for Women (NSCW) aser National Commission for Women (NCW), New Delhi na senteper May 03, 2017 nü Zunheboto Town Hall nung 'Human Trafficking' indang legal awareness sentong ka agiogo.

Anogo ka seminar nung jembidang Nagaland State Commission for Women (NSCW) mendenbula, Dr. Tamsula Ao-i ashiba agi, nisung shibelenba tebilemsü ya sensaker linük nung dang masü saka kanga renloker aliba linüktem nunga lir.

Tesasaba olen ka nung lai, nisung shibelen nütsüngji timbaka mines factory aser industry balala nung inyaker aser aayangertem aser teküp ayokba kitem nungi alartem lir, ta ashi.

Laisa, nisung shibelenba nungji ozüing, pei tangatetba, yimtenren aser rongsenkettsüng sendaktepa lir, ta ashi.

Dr. Tamsula-i ashiba agi, nisung shibelenba tebilemsü ya Naga tsürtem dak tali atalokdar aser iba ya lanurtem atema telung nung ola madoki tebilemsü ka kümogo. Iba tebilemsü ya temolung nung yur NSCW-i state ajunga nung lanurtem kümdangshia alitsü tesayuba balala agütsür. Nisung shibelenertemi, state alema orr mapa tajung aser taküm tajungba lidaktsütsü tenangzükba agütsübatem nung masadangi manidaktsüla saka parnok tebilembatem angateta mita alitsü asoshi lanurtem ajungshi.

Alima tesem ajunga nung nisung shibelenba anema raratsü asoshi tenangzükba agidang lai ashiba agi, "NSCW-i asen lokti nung nisung shibelenba dak sendakba nung tekümdangtsütem tesayuba balala agüja arudar aser iba anema raratsü asoshi nangzük

inyaker, aji asünung dang alima nung lokti balalai iba maparen anendaktsütsü merangba den asenoka densema 2020 tashi nungbo asen lokti nungi nisung shibelenba samadaksütetsü."

Iba sentong nungsa Additional SP, Relo Aye aser NSCW, legal consultant Khriesinuo Kire natia o tatsütsü jembia.

Tenati asenok temeden bushiba nung police shilem aser linük nung temzüng ozüing ajanga asenok nem teyari aser temeden balala agütsüba indang metetdaksü.

Iba sentong nung ADC, Nungsangmenla Imchen, wadang balala nungi tetsürtem, kaketshirtem, lokti lenirtem, GBs aser DBs tem aden. Iba sentong NSCW züngsem Asangla Cholong lenisüba nungagi aser Sumi Totimi Hoho (STH) Tir, Kitoli-i sentong nung adenertem pelaa agizüka liasü.



May 02, 2017 nü Lirmen yim dak Moatsü Benjung amungdang telok kati yar tsüngsangba noksa nung angur. Iba sentong nung tongti tesemdangjerji, EE Irrigation & Flood Control, Mokochung, Er. Lanu Longchar liasü. Iba benjungmung sentong ya Kr. Watila Lkr leniba nung agi aser LBC Pastor, Rev. A Mar-i sarasademba sülen VCM Chairman, T. Kirem-i lokti pelaa agizüka liasü. Sentong nungsa Cartographer, Temjenlemba-i Moatsü teratet lemsatop aser P. Meren Longkumer Retd SDEO-ia jembia liasü. Lirmen Watsu telen aser Lirmen Pati, Olangoin-i sobaliba ken ajanga shilem agi aser Nokpu Village Council, Yajang C Village Council, Akumen Village Arju aser Lirmen Students Conference-i yar tsüngsang balala ajanga shilem agi. Sashi & Asen aser Takumtsu Ayong nungeri ken ajanga shilem agi. Iba dak alia arr atsütep aser Bamboo Climbing-a agia liasü.

## SANGDONGER

Wameken Tzü Ali telongzük tesem ajak nung Tzü mopung kümzüksü sentongtem inyaka arudagi. Item maparentem den külemi Arem Shirurutem talisa Ozü sangnu kümzükba ayutsü nükjiong nung alushi nung Air Gun (prangpong) amshiba tanü anogo nungi shibanger. Aibelener shia dang Senchi Sen 5000/- achitsü Putu Menden-i lemtetba osang sangdonger.

Sd/-  
(I. Wati Jamir)  
Chairman  
Village Council

Sd/-  
(Ben Moa)  
Secretary  
Village Council

## NEC Secretariat nung E-office semzük

**Kohima, May 04 (TYO):** Mission Mode Project ka lir aser Minister of State DoNER aser Chairman, Dr. Jitendra Singh-i May 04, 2017 nü Ministry of DoNER, Vigyan Bhavan Annexe, New Delhi nungi Video Conferencing ajanga NEC Secretariat nung NEC e-Office semzüksüogo, ta NEC Secretariat sangdong ka nung metetdaksü.

Iba sentong nung Singh den Ministry of DoNER, Navin Verma, NEC züngsem, C K Das, NEC Secretary, Ram Muivah aser NEC DG, Neeta Verma nungera liasü.

e-Office ya National e-Governance Plan (NeGP) kübok Digital Workplace Solution

iba ya National Informatics Centre (NIC)-i yanglua benoker.

Iba ya ajanga Central Secretariat Manual of e-Office Procedure (CSMeOP) nung ajemdaker sorkar inyakyim nung Single Product tanaben amshitetsü.

Tang e-Office application ya NEC Secretariat nung File Management System, Knowledge Management System aser Leave Management System den külemi inyaker.

Mapang tatsüka tsüngda NEC-i movements 705 aser e-Receipts 578 den movements 2522 dena e-files 129 yangluogo, ta sangdong nungsa shia lir.



Dimapur, May 04, 2017: Brihostibarnü Kevijau Colony, Dimapur nung 32 Assam Rifles/HQ 6 Sector AR/HQ IGAR 5 KVA-i Solar plant ka semzüksüba sentong nung tangokba noksa ka angur. Iba sentong nung tongti tesemdangjerji Second-in-commandant 32 Assam Rifles, Firing Range, LT.Col. S. Rajendran liasü.

## NBSE-i NSEE tatidang osang metetdaksür

**Kohima, May 04 (TYO):** Nagaland Board of School Education (NBSE)-i, Para Medical/Agri aser Allied degree courses atema Nagaland State Entrance Examination (NSEE) 2017 tatidang May 13, 2017 nü agitsü, ta metetdaksüogo.

Iba tatidang ya Honibarnü, May 13, 2017 anepdang 10:00 ako nungi nikongdang 01:00 ako tashi agitsü aser Exam Centres ji Mezhür Hr. Sec. School, Kohima aser Ministers' Hill Baptist Hr. Sec. School, Kohima na asütsü

### Temetetsü:

i. NBSE Office nung Provisional Admit cards ji May 11-12, 2017

anogotem nung agütsütsü. ii. Candidate temi provisional admit card ji peisasa agizüksüla. iii. Nungdakba kakettem-forms, admit card indang counterfoil, attendance register amala nung signature ji kasa asütsüla.

iv. Admit Card agizükdang Examination fee sen 500/- (Sen noklang pongu) agütsütsüla.

v. NSEE Admit card agizükdang Identity proof atema candidate temi HSSLC mesüra HSLC Examination indang admit card original/photocopy sayutsüla, aser ibaji parnok ket nung ayutsüla.

# Assam nung 'Two-child norm' takangba kümdaktsütsü



Guwahati, May 4 : Brehostibarnü Guwahati nung Assam Health & Family Welfare Minister, Himanta Biswa Sarma-i osangbener den jembiba mapang tangokba noksa nung angur.

**Guwahati, May 04 (Agencies):** Assam kübok kibong ka nung tanur ana dang asotsü asoshi Assam sorkari tang temzüng 'draft' süa aliba nung MLA aser MP tem aibelenra pa/la menden nungi aludaktsütsü asoshi Centre dang asüngdangtsü, ta Health & Family Welfare Minister, Himanta Biswa Sarma-i Brehostibarnü ashi.

"Family Planning indang ozüng nung MLA temia anidaktsü asoshi Centre den jembitsü. 'Two-child norm' ya ajanga State Legislature inyaktsü jangrartem nem tazüokba agütsütsü," ta Sarma-i Guwahati nung osangbenertem

iba amala sapang nung shilem magitettsü, ta iba temzüng nung inoka lir.

"Iba sentong ya state sorkar website nung March ita inoktsüogo aser nüburtem tangatetba reprangdangtsü. Tang tashi nung email 88, social network ajanga suggestion 600 aser article 37 onok dangi media ajanga arua lir. Item onüktem nung ajemdaker tanabuba aser tatempangba 'population policy' yangluogo. Iba policy tasenba dang 'Draft Population & Women Empowerment Policy of Assam' ta nüngja agütsüogo" ta Sarma-i ashi.

Saka jakrep aser tanur asem asortem bo iba ozüng-i malentsü.

Tetsürtem temeden wazüka ayutsü asoshi temzüng aser ozüng reprangshitsü, ta minister-isa shisem.

"Tetsürtem temeden anema mapa tamajung inyaker merenshitsü asoshi ozüng tesashiba yanglushitsü. Sorkari renema aliba küm madongdang kibong akümba, tashiyim agi raksatsüba aser kidang kibong nung tetsürtem dak züka merenshiba azüoktsü asoshi ozüng tesashiba yanglutsü," ta Sarma-isa ashi.

Kinungbu sür aliba tetsürtem nem pension agütsütsü, balalular aliba aser kicha aliba tetsürtem nem teyari agütsütsü sentong inoksemtsü aser iba policy tasenba ya Assam sorkari August ita state assembly nung lemtettsü.

# Mi lendong nung takoksa ajuruba kibong shia nem 10,000 agütsütsü

**Guwahati, May 4 (Agencies):** Mongolbar aonung Ambari tesem anasa SK Bhuyan lenmang nung mi lendong nung takoksa ajuruba kibong shia nem state sorkari teyari sen 10,000 agütsütsüba Bodhbarnü sangdongogo.

Iba mi lendong nung ki 46 shi mitsü küma rongtok aser kiojen, osettsüset tem lakh aika jenjang rongtokogo. Aji saka lendong nung nisung kata asüba osang tang tashi nung kecha mali. Fire brigade police temi iba mi ghonda aika agiang temseptet.

Lendong atalokba tesem semdangba mapang finance minister Himanta Biswa Sarma-i ashiba agi, state sorkari mi lendong nung takoksa ajuruba kicha aser kibongtem khen atema jenoka alitsü asoshi tesem kar renemtsütsü atema jenjang tapet agitsü.

"Mi lendong nung takoksa aluba ajak jung junga asadanger tapet teyari agütsütsü," ta Sarma-i ashi.

Mi lendong nung takoksa ajuruba kibongtem khen atema Assam Textile Institute aser handloom & textile directorate, office nung jenokdaktsüa lir. Iba tesem nung aliba local temia teyari balala agütsüdar.

Kamrup (Metro) district administration ajanga kibongtemnem chiyongtsü, tzi

aser medical assistance peria agütsütsü asoshi inyakdar. "Mi lendong nung kaketshirtem indang kaket balala rongtokba dak sendakba nung text book tem aser tanga tenüngdakbatem angati agütsüdar," ta Kamrup (Metro) deputy commissioner M Angamuthu-i ashi.

Pai ano iba lendong adokba tera jung asadanger anogo 7 tsüngda nung osang agütsütsü asoshi tetuyuba agütsüogo.

Mi lendong adokba tesem indang ali kiburjia mezüdoki bushisüngdangtsü, ta Police commissioner Hiren Nath-i ashi. "Mi lendong adokba tesem nung taa agüja lidaktsüba kitem kanga tsüngtepa yanglua aliba ngutetogo, iba ajanga Fire brigade senzüsenpong kanga mesademi liasü. Ki kiburtem shirnoki lendong nungi kümzüksü asoshi kisüba yimya nung telatetba ka agüja aliba alema ki asü, parnok ajaknem tapet temerenshi agütsütsü," ta paisa ashi.

State nung fire & emergency services department dang yimti nung lendongbang nung aliba tesemtem tekeraba nung asadangtsü asoshi tetuyuba agütsüogo. Mi adokba tera tang tashi mejangja, saka LPG cylinder aika apokba ajanga iba lendong atalok ta bilemer.

# Northeast nung angometsür timba akümtsü

**Guwahati, May 04 (Agencies):** Northeast (NE) nung aliba nüburtem rongnung shilem 95-i angochir, saka NE tesemtem nung angoperia mangur. NE tesem nung tzi peria liaka angometsüba ajema aliba ajanga tanga tesem nungi aika bener arur.

Scientist, ketdangser aser sorkar ajanga NE nung tzi peria aliba nung 'open water fisheries' lapoktsü asoshi sentong balala yangluba mapang lir. Central Inland Fisheries Research Institute (CIFRI) ajanga Guwahati nung senden ka tawa amenba mapang, NE nung metsütetba angoki NE nüburtem peridaktsütsü asoshi state shia-i sentong tejangja yanglutsü jembitepa liasü.

Iba senden nung NE state tem nung aliba 'fishery institutes' aser fishery department nungi nisung 40 arua shilem agi.

CIFRI ajanga ashiba agi, 2015-16 küm NE nung angometric tonne (MT) 4,23,749 metsütet aser ibaji linük nung angometsütetba nung shilem 4 lir. Item angoya Assam nung

MT 2,97,00, Tripura nung MT 68,331, Manipur nung MT 32,000, Nagaland nung MT 8,220, Mizoram nung MT 6,828, Meghalaya nung MT 6,560, Arunachal Pradesh nung MT 4,410 aser Sikkim nung MT 400 metsütet.

Tang NE tesemtem nung angomet 4,82,384 nungdaker aser iba nungi shilem 86 bo NE nung aliba agiperidaktsür.

Iba senden nung Assam Fisheries Minister, Parimal Suklabaidya densem aser NE nung metsütetba angoki NE nüburtem peridaktsütsü asoshi Fishery Department tem külemi longjemer maparen ajak inyaktsüla, ta pai ashi. Assam sorkari 'Ponds for all - fish for all' scheme ajanga 'blue revolution' ka tenzükogo.

'Open-water fisheries' kisüng nungia NE nung angoton 139,846 (ayongtem nungi ton 14,142, reservoir tem nungi ton 8,358, floodplain wetlands, awatsüng aser iba amala tesem nungi ton 117,346) adokdaktsütettsü südi, ta CIFRI ajanga ashir.

**GOVERNMENT OF NAGALAND  
DIRECTORATE OF SCHOOL EDUCATION  
NAGALAND: KOHIMA**

NO.ED/SCHO/PMS-4/2014-15 DATED KOHIMA, THE 28TH APRIL, 2017

**RE-OPENING OF ONLINE VERIFICATION FOR RENEWAL APPLICATIONS UNDER PRE-MATRIC SCHOLARSHIP SCHEME**

This is to inform that while some applications have already received the scholarship amount for the year 2016-17, it is observed that despite keeping open the verification option till 02nd March, 2017, some institutions have not completed the verification process within the said time limit. Consequently, the matter has been examined by the Ministry and it has been decided to re-open the application verification process for 2016-17 pending/un-verified Renewal applications under Pre-Matric Scholarship Scheme meant for minorities.

ACTIVITIES	TIME-LINE
Last date of Renewal verification by Institutions	10th May, 2017
Last date of Renewal verification by District & State DEO Office.	25th May, 2017

No further extension shall be granted under any circumstances to any stakeholder. institutions that are yet to obtain the Login ID & Password are requested to contact their concerned DEO Office.

Sd/-  
**WONTHUNGO TSOPOE**  
Additional Director (HOD).

Issued by: DIPR

**VIGILANCE COMMISSION  
NAGALAND : KOHIMA**

NO. E.VIG-23/2010 DT. KOHIMA, THE 4TH MAY 17

**ADVERTISEMENT**

Application are hereby invited for the post of L.D.A.-cum-Computer Assistant in the scale pay of Rs. 5200-2020/- Grade pay Rs. 2600/- P.M. from the eligible Konyak tribe against the back ward tribe quota as per roster Notification NO.RCBT-5/87 (Pt-II) dated 4th September, 2015.

**1 No. of Post - 1 No.**

**REQUIRED QUALIFICATION.**

**2. Graduate from any recognized university with computer knowledge.**

The application enclosed with the following documents should be submitted to the undersigned on or before 25th May, 2017 during office hour.

1. Matriculate to Graduate	2. Scheduled tribe
3. Indigenous certificate	5. Employment exchange card
4. Two passport size photos	

**SEHJANG DOUNGEL**  
Secretary  
Vigilance Commission, Nagaland, Kohima.

Issued by: DIPR

**DELHI PUBLIC SCHOOL, DIMAPUR  
INFORMATION**

The Entrance Test for Admission into Class XI for the session 2017-18 slated at 2:30PM on **08-05-2017(Monday)** is now shifted to 09-05-2017( Tuesday) at 02:30 pm.

**PRINCIPAL**



# TIR YIMYIM YIMOBILEM (EDITORIAL)

DIMAPUR FRIDAY, MAY 05, 2017

## Mozü mamshiba lu

**A**senoki alu meyimnür kechiyong alu ayimtsüba mapa ya kanga tasak amai asenoki bilemer. Ibayongji, asenoki chiyongtsü alitsü sen-ang bushir aser bazaar nung chiyongtsü techinüba ajak alia achir. Atangji, alu ayimtsübaji tasak saka kodang asenoki bazar nung aliba chiyongtsü nung aliba miim mozü indang metetdir, asenoki itemji mechinütsü aser peisasa pei peribo züsentettsüsa aluang yimnüsü. Iba mapangji asenok ajak asoshi tongogo. Tanü India nung nütsüng crore noklang ka dak tali lir aser item ajak asoshi chiyongtsü nungdaker. Ajisüaka tebilemstü kaji, item nübortem ajak peria chiyongtsü züsentettsübaji ali temo melena amshiba mozü aser tsünusenpongtsü raksatsüba shirurutem südaktsütsü amshiba mozütem mamshiang alu meyimtettsü. Iba jagi aluyimertemi mozü tapu balala amshia alu ayimer aser nübortem paikaji chiyonger anungtsüsa züsentetter. Shidi asübo ibaji temoatsü aser takok tuluka, kechiyong iba amaji ka mozü amshia alu tululu meyimet asübo nisung aika aya agi süla. Ajisüaka, ano külen temang asoshi bilemdangdangbo, tanü putu nung aika aser tekaratiba nung züsentettsü asoshi mozü tapu balala amshia züsentetba aonsutsü, süngjanglijang, shi aser ango ajak ya miim achir amai dang lir. Item chiyongtsü züsentetdang amshiba mozü tapu ajakji chiyongtsü nungji lir aser item jagi tashidak akümer aser nisung taküm arishi temdokdaksür. Iba ama tekümdangtsü aser asensasa asen asoshibo mozü mamshii chiyongtsü züsentettsü nungdakba tangatetba ya Assam nung aluyimba nung scientist aser aluyimer Samir Bordoloi Brehostibar nü Dimapur nung Aor teintet lanurtem kar den shisalemsatepdang metetdakja liasü. Atangji, aluyimer ta asüdang, jet ta sensaker ta asenok mulungjangi arur. Ibayongji, lanurtem shingaia alu meyimner. Iba tangatetbaji tai ta mapa agi sayuba nisungji Samir ya lir. Samir ya Agriculture Science azüngba nisung ka lir aser tanga pa Assam Agriculture University nung Board of Management nung züngsem lir. Pai government mapa toktsür mozü mamshiba lu 'Organic Farming' tenzük aser tanübo Jorhat nung par luji agri school amato kümer school aika nungi kaketshirtem aluyimba indang angazüki arur. Paibo mozü mamshii tekong lu ayimtsü aser alu toktsüdang karaa aienba süngdong atemtsü ajungshir. Aji oda, ali temo melena mozü amshitsü melen süngo tu agi ali temo yanglutsüla aser alu tulu meyimaka pei peri aonsutsü adoktsü atema ki anasa atsübosa anepalutsü nungdakba indang pai tangatetba agüja jajar. Atangji, mozü amshia züsentetba chiyongtsü achitsüba ya tetsübuttsüka lir. Iba jagi tanü asüng chirtem yabo küm neter tashi nungbo arishi temadoktsü ta asadantetter. Asenoki Andra Pradesh tashi nungi bener aruba ango achiba nung ya dena mozü lir, kechiyong anogo aika bener jajayonga tamajung makümtsü asoshi mozü tutsür külenang rüjep den külemi süngden nung bener yoker. Iba kasaji asenoki achiba an shi aser ak shi ajunga ya mozü agi karakaraa indaktsür achiba chiyongtsütem lir, anungji asenoka karakaraa aser yirayiraa aiener aser yamaji melamelaa asür. Item timtem aser takoksa nungi asenok jenbua alitsü asoshi akok tashi asenoki bazaar nung ayokba jang, aonsutsü aser süngjanglijang machitsüla. Aji oda, kodang asenoki asenoksasa atsü nung mesüra alu nung mozü mamshii züsentetba chiyongtsü chidir, iba jagi sen kümzükba dang masü saka anema alir aser arishi alanger. Tashidak shia mozü lir aser tebilemstü shia takoktsü lenmang lir. Iba amaji Tsüngremi yangluja lir, anungji aonsutsü anasa ayi adokbaji menüngsar tzu nung meyokteper arak nung iba jagi aonsutsü raksatsüba shirurutem asütsüa akok. Iba amaji tendanga aser aluyimba nung mongin nisung Samir nunger ama den asüngdangtepa alu yimra, iba jagi alu melamelaa jungjunga yimtettsü. Idangjibo aluyimertemsa takarba, temang tajungba aser akümtaketba asütsü. Tanü lanurtemi item ama aluyimertemji kümtettsüla.

## OLEMSABANG

### Ya koma tokdentsü

- N. Saku Imsong, 4th Mile Diphupar: Dimapur

Iba khuret ocet ya mapang ka Tir Yimyim aser osang kaketem zünga arur, ya koma asü nung jungla ta shisadanga lir, oda osangtem ajak nung nübur ayongzükba, asen lima raksaba tebilemstü khuret lemsatepba papertem nung ngua arur, aser ajaki asen lima yanglushinüba teyongyaba ocettem angur.

Saka item tebilemstü kudasür kong lemsateptsü. Hau atangji asenok ajaki asen lima yanglushitsüla ta, saka kijai koda masür. Anungji item khuret ya sadoksadoka lemsateptsüsa asen Tsüngrem dang sarasadema shisatokden SABANG ka mesemteta shisa lemsateptsü asoshi temelonger ajak adenshia sensaksem aka nunga koma süla ta bilemba lemsateper, aser aji koda inyak nung jungla na ta bilemba shidanger.

Kechiaser, oda joko meyiwa tzümetsüngdang kechianga mashi ama, aser NAPONG-i ma ma ta keyi nem ngusetdaksüba ama arudarnee, Anungji temelongertem adenshir asen Tsüngrem dang ochi tamang agi sarasadem, tashi meshir mapusora asen lima joko asen lima asen nübur koda masüba jenjang kati menepa arudarnee.

Asenoki tamalen olemsabang nung asen lima (tanishir) P.Renthy Jamir-i tanü Naga lima tasür ayimoktsübatem to mamadoki lirma. Liner dang kangasa pelaba o lemsateper. Ano Tir Yimyim yimobilem nung azüngba amato yamaisa ora tarutsü nungbo asenok christmas aser New Year, Good Friday etc sentong yanglua amongtsü makoktsü ta bilemer. Ano külen na komaka degree ngudir nguaka backdoor majangi mapa mangutsü, kechiaser nai ochishia linüyonga na asemer opposition party maliba Govt nung aji tamakoktsü. Ano külen ACAUT ajanga aibelenbatem shidakba nung tuteta ayimtenaka, meyiper parnokang jail nung ayuba, nübur ola angadangtsü kenyongi mapang manguba, JCC/NTAC tentettem olaji yimdong nung meshimetsür ola amadang bilemba, item khurettem ya kong shisa tokdentsü ta lemsateper.

Kechiaser oda asenoki shimteta ayuba yimsüsürtem parnok molungjang remote control agi shipanga alitsü amaisa aiben ratamata-a bilemer. Oda asen nübur yamai shisabulutepa raratepyonga shibai nüburtemjiang NINANG TONGTONG ama külem külemi meyipshitsüa shibai metet. Asenoki mojing auersang ta sarasademer, saka mojingi koba sanction auyaa-a ali. Parnok ki maka, lenmang maka, kecha khuret maka.

Ajak toktsür Govt. mapa nungi penshion alurtembo asen Aor teimba saka temelen airtembo tangartem dang. 2001 küm JEE nung nisung 40 pass asü (shimtet) yangji asenok Aor 14 liasü oda, oda 5, 3, 2, 1 tashi pass asüba ngua arudar. Aortem shisadangdar ma? Aji tekolok agi memenep asü, marks agi memeneper, masü joko Aor züngshir shinga mali kümogonee.

Ano külen aseni aramesoa toktsür, tangar kinbo Clean Election sayubentsü aliba yamai anogo shia paper nung angur, saka shisashirtem ola kangabo tzüra matem bilemer. Ajidang masü, saka tamangertem agi sünga aliba state ka nung tamangartem anema yamai yipru tesashi onaka NBCC, ABAM aser Arogotem ola mangashir. Oda alima otsütem rongnung yasa MANGTSÜTIBA ta bilemer. Asü backdoor sen agi madokteter. yamaisa ora, oda, oda, hai tamanger ni sen lack 5 agütsütsüa (nai sentepi mao shia) naia koma bilemer ta ajemalua arutsü. Oda, oda tekülem ki azüngtettsü, tershilem agütsür malitsü Tsüngrem mapa inyakner malitsü, ajaki pe ajungtsü dang bilemstü, Tsüngrem mapa inyakertem tezüdang tenzüktsü, aser lula-a akümtsü, aikati Tsüngrem mapa inyakaka rongsen dang meima akümtsü mapang arudar.

Anungji ya koda asü nung takok ngua Tsüngrem peladakja asen lima temelenshiba ka dangi bener arutsü ta sarasadema temelong tendangertemi anir ochi shir sabang ka tenteta shisa tokden aka nung jungdisü ta iba olemsabang ajanga lemsateper. Tazüngertem ajak Tsüngremi mojangma.

**Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir**

## Kohima nung "Marriage Enrichment Retreat I & II" sentong agiogo



**Kohima, May 04 (TYO) :** April 28 nungi 30, 2017 tashi Don Bosco College, Kohima nung Marriage Enrichment Retreat I & II (MER I&II) sentong agiogo.

Kiyimba ajanga Tsüngremer sentong atalokba jung junga angatetsü aser tenüngsang agütsütsü asoshi 'Marriage Enrichment Retreat' ya amung aser iba sentong ya kibong kümer aliba amangbapurtem asoshi liasü.

Khristan kibong ka nung Tsüngrem sentong kanga jangja aser telungi ia angatetsü asoshi ibai Tsüngrem O angateta bushiba aser shisadanga mapang ka liasü. Iba sentong ajanga kibongtem Tsüngrem nem bendanga agüja pei taküm Pa asoshi tenlatsü maongka ngutet.

Kibong nung apuani na pei sasa asadanga, tena tsüngda tesendaktep, kibong jenjang asadanga aser Tsüngremi mulungba kibong ama Tsüngrem sentong nung alitsü asoshi bushidanga asadangtsü mapang nungdaker. Apuani naprongi Tsüngrem nükjidong angateta Tsüngremer tajaba ataloktsütsü asoshi mapa agi inyaktü mapang nungdaker.

Apuanitemi Khristan den lungjemtsü aser sarasademtsü angazükba nung shilem agidakja parnok kibong tesendaktep tajungba küma Yisu Khrista dak amendaker Tanela Temeshi tashi nung liyonga aotsü nükjidong nung iba sentong agia liasü.

MER nung inyakyim balala ajanga kibongtem shilem balala agidakja tangazükba tajung agütsür aser iba mapang parnok

nem Tsüngremer sentong nung alitsü angazükdaksü.

### Item inyakyim balalaji yamai:-

**SARASADEMBA:** Iba retreat nung apuani na nem kija aser lokti sarasademtsü mapang peria angütsü. Sarasademba ajanga Tsüngremer tajaba angateta tamang akangshidaksür.

**TESAYUBATEM:** MER I nung onük tenet tashi liasü aser item rongnungji Khristan kiyimba asadanga kibong taküm bushidanga dena lir. Iba nung ya Laishiba dak ajemdaker tesayuba agütsüba dang masü saka anogo shia asen taküm nung nungdakba tsütsü tesayuba jenti keta lir.

**APUANINA SENSAXSEM:** O jembiba sülen kinungbo aser kinungtsü na sensaxsem agidakja tena kibong nung kechi nungdaka ali ibaji rasaa jembidaksü.

**SENTONG YANGLUBA:** MER tatemlen apuani tem pei kibong sasep nung mener parnoki angazüka arubatem nungi jenjang koba agia mapa küma inyaka aotsü ibaji sensaxsemgakja liasü.

**FELLOWSHIP:** Iba sentong nung shilem agiba kibongtem ajak sadok sadoka dendaksütsü asoshi MER-i sentong tepiyong nung, balakata nikonngang aser pelatepa kazüba mapang sentong kanga junga yanglur kibongtem tsüngda sensaxsemtsü mapang lapoktsü.

**EUCHARIST:** MER sentong tembangba mapang, Temeshi Tekülem agi. Iba tekülem nung kibongtem shia pei kiyimngang nangzükba tanaben meyipa reprangshidaksü aser pei

sentongtem Tsüngrem nem bendanga agütsü.

Marriage Enrichment Retreat I onüktem aser tejembirtem;

Talk1. 'Serving God through Christian marriage' onük Catherine Kethokhrienuo-i jembiba

Talk 2. 'The Christian couple as a pastoral team' onük Norbert Neikehetuo-i jembiba

Talk 3. 'The role of a Christian Husband' Marcus Mengukhrietuo-i jembiba

Talk 4. 'The role of a Christian Wife' Angela Kenei-ü-i jembiba

Talk 5. 'Effective communication in marriage' Annabelle-i jembiba

Talk 6. 'Healing our marriages' Vic Dela Torre-i jembiba

Talk 7. 'Building our homes for God' Danny Abutas-i jembiba

Marriage Enrichment Retreat II (MER 2) ya CFC nung keta aliba sentong lir. Ibai CFE kümnabuba nungi tenzüka shilem agir kibongtem ajak asoshi lir. Iba sentong nung züngsemtem nungi tedener tem dang adener saka unit lenir tem asoshibo tongtibang lir.

### Marriage Enrichment Retreat II;

Talk1. 'What makes a Christian marriage work' Vic Dela Torre-i jembiba

Talk2. 'Unity in marriage' Annabelle-i jembiba

Talk3. 'Communication' Salve Dela Torre-i jembiba

Talk4. 'Sex in marriage' Danny Abutas-i jembiba

Talk5. 'Christian parenting' Vic Dela Torre-i jembiba

Talk6. 'Empowering our marriage' Danny Abutas-i jembiba

Marriage Enrichment Retreat I & II atema Service Team tem nungji Bro Marcus Mengukhrietuo aser Sis Angela Kenei-ü na team lenirtem asü aser Sis Jeanne Asanuo, Bro Norbert Neikehetuo aser Sis Catherine Kethokhrienuo; Bro Alexander Kehouletuo & Sis Liza Kevilenuo, Bro Mathew Medo-o & Sis Catherine Khriengunuo nung züngsemtem liasü

## ANOGO ABEN TSÜNGREM DEN

### AJEMALUBA SEMPET TAJUNG

*Alima nung alir ajak dang alaka iba nisung Mosa kanga ajemalua liasü' - Züngdanga 12:3."*

Ajemaluba ya asenok asoshi sempet rongnung tulutiba ka lir. Aser ajemaluba sobutsü sema aliba nisungji ajaki meimer. Tamangertem shia Yisu den ainba asadangtsü lisüji ajemaluba ya lir. 1 Peter 5:5 nung "Tsimgremit asükümer nokdang aser ajemalur nem taochi agütsür" Tsüngrem O jaki ashir, Mosaji ain-aping liaka, pai tila kümtet aser pa tashi tazüokba ka nung yutet. Tatishitsü agi, asenoki asen anemertem asoshi tamajung inyaktü koka lir ... saka aremzüka aseni tila küma ajemaluba taremsük tanela ji agi asen shiji azüoktsüla.

Tanü asen lima aser lokti tentet ajak nung iba ajemaluba tanela ya nungdak aser alitsüla. Nai aser ni jembidang, mapa inyak dang, shisatokden ali dang, tekülem ali dang, sayutsüngi dang, Ken ten nung, asen lenmang nung senzü dang, lokti senden aser tekülem nung amen dang ajemaluba yimya aser nübusen tanelaji asen dak alitsüla. Kodang ajemaluba asen dak lidir, Tsüngrem tali sentsüwangshidaksür aser ibaji asenok asoshi temoatsü tulu lir.

### SARASADEM

*Oh Tsüngrem! Tanü nai onok kanga meim nung pelar, anogo shia taküm liba liro nung ajemaluba agi onok azüok dakjang. Amen.*

## Liaoning nung Khristantem senden ajungbena mita aru



**Liaoning, May 04**

**(Agencies) :** April 26, 2016 nü China anüdoklentip tsütsü anüdoklen aliba province nung Sannükertem ki ka nung sendena aliba mapang ka nung sorkar ketdangsertemi ajungbena mita aru.

Sannükertemi, China tesem balala nungi ki balala nung agiba Arogotem nungi "Unity in Christianity" sentong asoshi sannükertem nisung 40 shi adenshia liasü. Iba sentong ya Kunming, Yunnan nungi Sannüker Guo Pingxi-i ayongba liasü. Sentong tagidak nung security ketdangsertem den special police parnoki nisung 100 shi aser patrol gari aika iba ki telung jagi nungpoka ait.

Police tem jagi yangji aliba sannüker 3 idangjisa pua bener ao aser tanüngbaji ki telung nungji shibanga yur kija aser telok dang asüngdangya meso. Police-i mitba aser asüngdangyaba mapaji ghonda aika agi aser sorkar dang nungi temelaba kecha makai sendena agir ta sannükertem aitsü. Sannüker Guo ji China

anemer bendanger telok nung dena lir ta police temi aitsü, ta yangji dena aliba sannüker rongnung kati ashi.

Iba amai masüba tai tongloksütabaji temenünüsüka lir, ta pai shisem.

"Onoki parnoki ashibaji aitsü kechiba süra sannüker Guo ji China senso tajung ka lir. Pa kodaser China nung anemer bendanger telok nung züngsem asütsütsü ? Sannüker Guo-i anir China nung tamanger longjemtsü asoshi inyakbaji China Sorkari tsübur," ta iba sannüker jagi ashi.

November 2014 nung Dazhou, Sichuan nunga tamangba tsütsü inyaka sayutsüngiba ajanga sorkar ketdangsertemi Guo dak kanga tenüng yok aser pua anir oa anogo 15 tashi tepuokdak ayu. Tamangba nung lenir Sannüker, Guo Pingxi aser pa den külemi tamangba aser meimchir temetem atema inyaker sannükertem senden aliba mapang China nung ketdangsertemi mapang aika nung ajungbena mita aoer, ta osang ajanga ashi.

## ABAM-i temesepba chiyongtsütem nokdangba anogo amung



**May 04, 2017 :** ABAM Literature aser Education Ministry ketdangsuba nung May 3, 2017 anogo Ao Baptist Arogotem ajak nung temesepba chiyongtsütem nokdangba anogo mungogo. Tanü lokti, kibong aser kija takum jenti temesepba chiyongtsütem ajanga shi aser tanela ajak samaa akümba aser tarutsü tia asen nübur asoshi kangasa

tamajungba asütsü anna nung lir ta angateta iba anogo mungogo.

Tanurtemi iba anogo temesepba chiyongtsütem ajanga adokba timtem playcard bener yimtung sema aoba den külemi kibong telungi ia tsüraburtem nem temesepba chiyongtsütem ajanga timtem adokba tangatetba tejangja agütsüba den par lanur putu

teimla samaba tebilemstütem lemsateba jajaogo. Iba sentong ya taküm agi tasemben buba ABAM-i agia arur aser asen lima temelenshi aser nübur tangatetba arutsü nükla nung maneni amangbapur ajaki mapang ajak nung tesayuba tejangja agütsütsü ABAM tamang ayur. Tsüngremi iba sentong nung shilem agir ajak mojang.

**OLONG PAITEP # 4412**

1		2		3				4		5
6										
		7			8					
9			10					11		12
		13								
		14				15				
16					17					

<b>TIPILEN</b>		<b>LANGTSÜNGLEN</b>	
1. Ana masü	- 6	1. Alima mapangtem	- 5
4. Mapang tasazük	- 3	2. Telok / aika	- 5
6. Tarutsü nükla	- 9	3. Nü sasa	- 3
7. Pei meyong	- 6	4. Tzü shiruru	- 4
10. Tzünglu nokdangba	- 6	5. Metetpelaba o tem	- 5
14. Tiyazü jembia külakoktsüba	- 9	8. Temang nung jajaba tzü	- 3
16. Nü den tantsü	- 3	9. Iba ama	- 5
17. Khuret	- 6	11. Nokpang nung inokba yin	- 5
		12. Tasü masü	- 5
		13. Mit adok	- 4
		15. Metetnua asüngdangba	- 3

**OLONG PAITEP # 4411 TELANGZÜBA**

<b>TIPILEN :</b>	<b>LANGTSÜNGLEN :</b>
3. Tatem, 5. Jabaso, 6. Kotak, 8. Aru, 9. Aut, 11. Lungpok, 14. Pua	1. Ajuru, 2. Jaja, 3. Toktep, 4. Tatsük,
16. sen, 17. Mitsa, 18. Nükpok, 19. Ozüng.	7. Kasa, 10. Alem, 11. Leptsü, 12. nepang, 13. Temko, 15. Aika.



**TESAYUR-I ALOKBA DANG ASÜNGDANGER**

- Tesayur** : Alokba, kechiba nai umbrella bena liaka tzünglu agi ajadaksür ?
- Alokba** : Kütsüi kü nem anüshi dang agütsü.
- Tesayur** : Tsüma lima arem nung Naga nunger ka aser nashi ka Police-i ajurura shiba dak akatsü ?
- Alokba** : Naga nungba dak katija!! Kechiba süra parnok tsüngdang nashiji jenjang tuluba.
- Tesayur** : Tetsüdi ka laora ola adoktsü asü madoktsü?
- Alokba** : Niusngbo tetsü laoadokra ola adoka ajeptsü, saka akbo tetsü lao nungang ola madoki mama ayongtsü.
- Tesayur** : Ajungben na India leni onü nung otettsü asü motettsü?
- Alokba** : Kodanga motettsü, kechiaser ni Aadhar Card sema mali.
- Tesayur** : Süra, kodakleni atutsü temela asü tasak?
- Alokba** : Temela! Tatishitsü agi kübu salang nung mener khu dakya lira, Khudaklen jagi ni melamela soketa tuadoktsü.
- Tesayur** : Kü dak tangshijang, ya shibai ashi?
- Alokba** : Tesayur, ne dak masüaja! Ena, süngdong ka lir aser idakji tangshijang atanger.
- Tesayur** : Oh!!! ALOKBA!

Lilir : I. Kilang Ajem, Indisen, Dimapur

**TANÜBO NAI LANGZÜANG**

Q. India nung kübok state-i mezüngbuba Financial Year, January - December ta asütsü tawa melenshi ?

[A] Maharashtra [B] Kerala

[C] Andhra Pradesh [D] Madhya Pradesh

(Taruba adok nung onoki langzüsü)

**YASHIADOK TELANGZÜBA : Sanjay Pratihar**

**Happy Birthday**

TENÜNG : LIMAYATET PONGENER

Tasoba Anogo : 5th May, 2016

Küm : 1

Talidak : Sabangya Compound, Chungtia

Ozü Temeim jabaso YATETBA, tenyanglur Tsüngremi

küm Ka(1) tashi arishi moaja anir aruba atema

Tsüngrem tenüng asanger. Ano tarutsü nung

Tsüngremi arishi, shiasatsü aser anogo maneni


temjena moajangma.

- Temeim Tsürabur, Azü, Aüv, Azaba, Aküv, Azaüv & kinüngertem.



**NAIA YA METETER MA**

**YUSRA MARDINI**



Syria refugeetem mener aliba rong tzüym telungi meküpoka yia lia kümzükla Syriatsür Yusra Mardini, United Nations High Commissioner for Refugees (UNHCR) nung Goodwill Ambassador asütsü tawa shimetogo. La ya tzuwar ka aser tang Berlin, Germany nung telidak aser tang la Refugee Olympic Athletes Team (ROT) nunga züngsem aser taoba 2016 Summer Olympics, Rio de Janeiro nung akadanga lai shilem agia liasü.

**SUDOKU # 3525**

**TELANGZÜBA # 3524**

				9	8		1	4	8	3	5	7	6	2	9
4		2		7	5		3	9	6	8	4	2	5	1	7
7	9	1		6	3		2	7	5	1	9	6	3	4	8
6			9	8			9	6	1	7	8	4	2	5	3
	9	1	6	2			5	8	2	6	3	9	4	7	1
	2			7	1		4	3	7	5	2	1	9	8	6
9	1		4	3	5	2		6	5	4	9	1	8	7	3
3						1	7	7	1	3	2	6	5	8	9
2			7					8	2	9	4	7	3	1	6

**OJANG LUTEP # 4017**

- GATETANTBAI :
- MATSANGATENG :
- ANDAKTSÜGATETTSÜ :
- METSÜRANGLA :
- MTSANETEGI :
- ETSMEMETANG :
- MEDAKTSÜTETTSÜLA :
- YJIAMA :
- INETBYAKTO :
- JLAUNG :


**OJANG LUTEP TELANGZÜBA # 4016**

TSÜNGREMI AJAK NEM SEMPET AGÜJA  
LIR SAKA AIKATI AJI MAMSHIR

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):




Nai nü kisüangi dang mapa inyaksü jangrar aser tanü iba tejangraba tuluba akümtsü südi. Anungji nü mapa nung takok ngunüra kanga junga shisadanger inyangang.



Mapa tulu inyaktettsü asoshi nüdak sempet lir aser tanüa nai mapa junga inyaktettsü. Nai maneni mapa tali inyaksü merangang.




Tanü nai lokti mapa toktsür nü nija mapa inyaksü bilemstsü. Mapa inyaksü tsüba tebilem aser maongka tajung ta bilema inyangang.



Tanü na nija asoshi mapang akitetang. Asüng medemerem den külemi mapa inyaksü sentong yangluang aser anisüngzüka liang.



Tanü na kilung nung kazütsü bilema alitsü. Tanü na süngjema aliba ajanga tarutsü anogotem asoshi jenjang tajung yanglutettsü südi.



Tanü nü kisüangi dang mapa aika inyaksü mebilemstsüla. Medemer aser kinungertem den sensaksemang aser anisüngzüka alitsü sentong yangluang.



Tanü nai timtem majurutsü, anungji nü sempet tajung amshitsü mapang tetemsü asütsü. Tanübo nü nija mapa kar inyaksü merangang.




Tanü na pela alitsü, anungji nüdak taremsük yimya tajungba kümdakjang. Nisung kari nü mapa nung meinprongtsü südi, saka aji tongtibang nungdak asoshi lir.



Nai mapa junga inyaktettsü aser nü kisüng alitsü bilemstsü. Tanü nai mapa kanga kera inyaktettsü aser item mapa tanaben repringshitsü mapang peria alitsü.



Tanü nai mapa tali meinyaksü merangang. Nü mapa ajanga na ajungshiba nai metettsü aser iba mapang anisüngzüka ali tajungba asütsü.




Nai inyaksü bilemba mapatem atema jembia makazüi mapa küma inyaksü merangang. Lokti nung temelenshi arutsü atema nai anir mapa inyak tenzü kang.




Tanü nai akok tashi süngjema alitsü merangang aser mapa nung takok angutsü bilemang. Mapa inyaksü meteta aliba nisung kar dang nungi teyari meshiang.

### 3 Idiots Mexican Trailer sayaogo



May 4, 2017 (Agencies): asoshi o toktepa liasü. Maneni nunger shilem actors Alfonso 2009 küm Aamir Khan indang Dosal, Christian Vazquez aser iba film ya alima linük aika nung German Valdez-i agitsü. tenüngsang agizükogo. Film ya Indonesia nunga kanga nungtungu aküm aser nübürtemi Twitter ajanga pei Iba film ya tawa Mexico tebilembatem lemsatep. nung yanglushiogo aser iba trailer ajanga film nungtungu akümba belemtetshidaksütsü. Film nung Aamir Khan, sendakba nung temelenshi Madhavan aser Sharman Joshi

### 2016 küm Adele-i million £40 aazük



May, 04 2017 (Agencies): Adele-i la indang kensep '25' ayokba aser alima ajunga sema kentena senzüba sentong nung sen aazükba meyokteper ita 12 tsüngda nung la rongsen million £85 nungi million £125 kümogo. Yaküm küm tsüngda nung la rongsen million £40 agi timba aküm. Sunday Times newspaper's annual wealth survey ajanga sangdongba agi, Adele ya alima nung tetsür musician rongnung takartila lir, saka Britain nung musician takartibatem sükdangba rongnungbo la jenjang 19buba nungang lir. Tang Britain nunger musician rongnung takartibaji Sir Paul McCartney lir. Beatle telok nung züngsem, Sir Paul McCartney indang rongsen ajak meyokteper million £780 shi lir aser taoba ita 12 tsüngda nung pa rongsen million £20 dak tali renlok. Iba sülen tanabuba aser tasembuba jenjang nung Lord Lloyd-Webber aser U2 lir. Parnok rongsen million 740 aser million £548 ta lir. Iba tarensen nung Sir Elton John jenjang pezübuba nung lir. Pa ket nung rongsen million £290 lir aser pa sülen Sir Mick Jagger jenjang pongububa nung lir. Pa ket nunga rongsen million £250 lir. Adele ket nung tang tashi nung rongsen million £125 lir. La alima ajunga nung ketenba sentong 122 nung shilem agiba ajanga Box offices nung sen million £138 shi aazükka liasü. Arishi küm 28 tain kentener-



Taipei, May 4 :- Taiwan, Taipei nung 2017 May 4 nü Star Wars Day amongba mapang, "Guardians of the Galaxy" advertisement ka jakdang Fan tem "Star Wars" nung character balala tem ama sobur tangokba noksa nung angur.

### TAN HOPTA ATEMA - KOMA SÜLA ?

Q. Govt office ajak nung anogo shia biometric system amshia tenüng aja nunga koma süla ?

Olong 20 shi nung May 05, 2017 tashi nung iba telangzüba ya onok dangi e-mail - tiryimyim@gmail.com mesüra SMS - 9856121232 / 9436072422 mesüra Tir Yimyim Facebook account ajanga yokang. Telangzübatemji taruba Hokolbar nü adoktsütsü.



Mumbai, May 4, 2017 : Bodhbar aonung Mumbai nung Television actor Gautami Kapoor aser kinungbo na den bollywood actor Ram Kapoor aser Philips India strategy & Direct 2 patient business nung tekolak, Priyank Agarwal, sleep medicine & senior consultant neurology nung director, Dr Manvir Bhatia nungeri amoa junga maoba tsütsü meteta aliyim Philips India osangbenertem senden ajanga prokba noksa nung angur.

### Sorkari Mobile Phone tem yanglutsü asoshi mapa lateta yutsütsü

**New Delhi, April 28 (Agencies) :** Linük nung Mobile phone tem sen dalang agi yanglutsü asoshi maongka lapoktsütsü mechi nung Ministry of Electronics & IT mobile phone tem yanglutsü asoshi mapang lateta yutsütsü renemogo. Iba ama mapang lateta yutsütsü ajanga handset aser iba dak sendakba osettem nung tax tsütsü anisüngzük alutsü.

Iba osang ya ministry nungi ketdangser tejen kati osangbenertem dang metetdaksü. Iba ama inyakba ajanga linük nung mobile phone tem yangluba tsütsü sorkari bendanga agüja inyakba sayur. "Phased Manufacturing Programme (PMP) ya Ato

Kilonser Narendra Modi-i tenzükba 'Make in India aser Digital India' inyakyimtem asoshi otsüsütsü inyakyim ka asütsü. Iba den anitepa PMP - II-a küm asem tsüingda nung tenzüksü aser ibaji ajanga oset yangluba tsütsü shilem 39 nungi 50 tashi ajungkettsü," ta Indian Cellular National Tir, Pankaj Mohindroo-i ashi. Iba inyakyim ajanga mechanics taa, die cut parts, microphone aser receiver, key pad, USB cable, camera module, display assembly, touch panel, ringer amala osettem ajak nung sen talila agütsütsü aser sen jenjang ataktetsüba nung mapang lemdanger tali sanga oa inyaksü. "Iba ya tagütsü tajung aketba tongtibatang sentong ka lir, koba

ajanga mobile phone aser iba dak sendakba industry-a automobile industry den saku kümdaktsütsü," ta Mohindroo-i ashi. Mapang lateta yutsütsü oset yanglutsü sentong ya industry aser sorkar - Fast Track Task Force na senteper benok. MeitY kübok tenzükba panel yagi 2019 küm tashi nung mobile phones million 500 yanglutsü aser 2019-20 tashi item mobile phone tem rongnung million 120 tashi bendanglen ayoktsü nükjidong lir. Parnoki küm shia handset sen lakh crore 1.5 nungi 3 alang yanglutsü tebilemba lir. 2015 nungi 16 tashi nung 54,000 crore aliba 2016 nungi 17 tashi India nung yanglutetba mobile phone tem ajanga sen 90,000 crore atongtsü.

### MBA Rural Management küm ana azüngtsü asoshi IIMHR-i form agütsür

**Jaipur, May 04 (Agencies):** Institute of Health Management Research (IIMHR) University's School of Rural Management nung MBA Rural Management indang CSR, Agri Business, Rural Health, Water Sanitation & Hygien aser Rural Livelihood küm ana azüngtsü asoshi form agütsü tenzükogo. Iba reju nung MBA programme agütsü atema kaketshir 30 dang shimtsü. Sorkar aser nija indang sector nung rural development inyakyim tejanga sayutsü aser tang tensa-i meshiba ama takutet kaketshir agütsütsü asoshi iba sentong ya yanglua lir. Iba course agütsü asoshi

kaketshir ka tazüingba ji küm asem nung Bachelor degree aser 'recognized' university, MAT/CAT/CMAT/ATMA/GMAT/XAT mesüra national level management aptitude test nungi marks shilem 50 bosa ngur alitsüla. SC/ST category nung aliba kaketshirtem atema marks ya shilem 45 alitsü. Kaketshirtem marks shilem 60 nungi timba ngur alir nem parnok fee shilem 50 asoshi scholarship agütsütsü. Kaketshirtem final tatidang agütsür alirtem-ia iba course atema form agütsütetsü aser shimtetra ita ana tashi nung Bachelor degree indang kuli kaket sayutsü maongka agütsütsü. MAT/CAT/CMAT/GMAT/

ATMA/XAT score maliba kaketshirtemi IIMHR University indang offline ajanga agütsütetsü aser iba atema tatidang IIMHR MAT aser IIMHR Rural MAT tatidang ya April 13, June 15 aser July 06, 2017 nung IIMHR University campus nung agütsü. Tongtipang anogotem: 2017 June 30 tashi nung application form meshütsü akoktsü aser 2017 July 4 tashi nung item form ya IIMHR University nem agütsütetsü. Application form ya www.iihmr.edu.in nungi download sütetsü aser kasa website nung online ajanga form agütsütetsü. Küm pezü tsüingda item



Guwahati, May 4, 2017 : Brihostibarnü Chief Corporate Affairs officer, Idea cellular, Rajat Mukarji (achiji) aser Circle Head, Assam & NESAs, Idea cellular, Pradip Chanda nati Guwahati nung Idea 4 G lapoktsüba noksa nung angur.

company tem nungi University semdanga lir: Gujarat State Watershed Management Association (GSWMA), Rajasthan Rural Livelihood Mission, Rajeev Gandhi Foundation, Foundation for Ecological Security (FES), Reliance Foundation, Coal India Ltd., Govt of Gujarat, Govt of Madhya Pradesh, Save the Children, Krishak Bharti Cooperative Trust (KRIBHCO) ajanga tenzükba Gram Vikas Trust, etc. Iba course renemer nem company balala ajanga küm nung itasen lakh 4 nungi 6 tashi agütsütsü asoshi maongka agütsür.

### Oppo-i India nung F3 smartphone sayaogo

**Mumbai, May 4 (Agencies) :** China nung smartphone yanglur Oppo-i Brihostibarnü selfie agütsü asoshi tongtibatangser yangluba smartphone kase 19,990 agi India nung



linük nung aliba lanurtem den parnok aginüba ama selfie inyak yim agütsütetsü," ta Global Vice President aser Oppo India President, Sky Li ashi.

F3 tejaklen sayaogo aser iba phone ji Flipkart ajanga peria angutsü. F3 smartphone ya May 13 nungi mezüing ayok tenzüksü aser jilia manganertem asoshi May 04 nungi 12, 2017 tashi mapang lapoktsür. Talinertemi ano Oppo store tem ajangka jilia mangatetsü.

camera ana keta lir -- kija tangoktsü asoshi 16MP aser telok tangoktsü asoshi 8MP lens.

Oppo aser Board of Control for Cricket in India (BCCI) na senteper Indian cricket team indang jersey-a sayaogo.

Iba smartphone ya octa-core processor agi mapa inyaker. Phone nung 4GB RAM inokja lir aser phone nung memory 64GB keta lir. Iba den külemi Operating System ColorOS 3.0 inokja lir.

"India Cricket team den loktepa ajanga Oppo-i lanurtem den tesendaktep tajung yutetba dang masü saka

"BCCI den Oppo sendaktepa akümba asoshi onoki pelar. Iba tesendaktep ajanga India nung cricket tali ajungkettsü," ta BCCI CEO, Rahul Johri-i ashi.

Logo of Employees State Insurance Corporation. Text in Hindi and English: EMPLOYEES STATE INSURANCE CORPORATION, Ministry of Labour & Employment, Govt. of India. Contact information for various offices.

**Scheme for Promoting Registration of Employers and Employees (SPREE)**

Available one time opportunity of "REGISTRATION SPREE"

Reference to the advertisement on the above matter on 04.01.2017, 18.01.2017, 21.02.2017 and 15.03.2017, it is to bring to the notice of all concerned that the special drive titled "SPREE" Scheme for Promoting Registration of Employers and Employees has been extended from 01.04.2017 to 30.06.2017 by another 3 months.

The one time drive SPREE, intends to extend the social security benefits to all eligible under the Act, who will have till now been kept out of the ESI Coverage, for whatsoever reasons.

The features of SPREE are:

- The employers registering during the period will be treated as covered from the date of registration or as declared by them.
- The newly registered employees shall be treated as covered from the date of their registration.
- SPREE will not have any bearing on actions taken/required under ESI Act, if any, prior to 30<sup>th</sup> December, 2016.

For clarifications, if any, regarding SPREE, nearest Branch Manager may be contacted.

REGIONAL DIRECTOR





New Delhi, May 04, 2017: Brihostibarnü Rashtrapati Bhavan, New Delhi nung Tir, Pranab Mukherjee-i National Institute of Financial Management nungi Indian Defence Accounts Service (IDAS), Indian Civil Accounts Service (ICAS), Indian Post & Telecommunication Account aser Financial Service (IP & TAFS) 2016 Batch Probationers den jembiba noksa nung angur.

## Light bills Aadhaar den sendaktepsü sorkar sentong lir

**New Delhi, May 04 (Agencies):** Bodhbarnü Power Minister tem Conference nung power Ministry-i state tem dang light bill saruba maparen ya digital akumtsü atema ajungshiogo.

State shia pei sasep nung Electricity maparen ya achaayanger, anungji Centre-i iba dak sendakba nung tebilemba onüktem ang benoktsü akok.

Union power ministry aser state ajunga nungi minister tem senden nung shilem agirtemi ashiba agi, light bill saruba maparen nung digital benokba ajanga power distribution company temi takoksa nguyaa aliba anentsü.

Ketdangser kati ashiba agi, "Piyush Goyal-i, kechiba state temi electricity bills ji Aadhaar

den mesendakteper ta asungdangogo. Paisa, discoms ajanga bill tem bank accounts den sendakteper, koba ajanga bill period tembangba mapang nung senji 'deduct' asür. Iba ya ajanga sen magütsüba ajanga saru nung takoksa anguba koktettsü."

Ketdangser kati ashiba agi, "Aadhaar ji electricity bills den sendaktepba ajanga ochishi alitsü aser digital maparen ajungkettsütsü ta Centre-i bilemer. Iba ya ajangasa discoms maparen tajungba akumtsü."

Income tax returns atema sorkari Aadhaar compulsory kümtsüogo.

Mezüngbo Aadhaar ya sorkar scheme balala aser subsidies atema tenzüka liasü, ajisüaka tangbo service balala aika atema Aadhaar ya

compulsory kümogo.

Cooking gas subsidy atema Aadhaar sendaktepba ya alima nung direct benefit transfer (DBT) programme tulutiba kümogo.

Taoba sorkari cooking gas nung DBT tenzüka liasü, saka state kari ibaji anema nokdakba sülen iba scheme anena liasü.

Ano tan sorkaria iba scheme tenzükshi.

Tamasabo DBT ya bank accounts den sendaktep saka Lok Sabha nung Aadhaar legislation agizükba sülen subsidy agitsü atema cooking gas consumer number den Aadhaar sendaktepa liasü.

State tem aser UTs nungi Power, Renewable Energy aser Mines Minister tem senden nungsa cyber security aser digital payments atema jembia liasü.

## Linük nung temerüktiba yimtiji Indore, memerüktibaji Gonda lir

**New Delhi, May 04 (Agencies):** India linük nung yimti 434 indang suvey agiba nungi temerüktiba yimtiji Indore shim aser memerüktiba yimtiji Uttar Pradesh nung Gonda yimti liasü.

Temerüktiba yimtitem tanabuba jenjang nung Bhopal, tasembuba jenjang nung Visakhapatnam aser jenjang pezübuba nung Surat yimti lir.

Iba tarensen nungsa Dimapur-a (Nagaland) jenjang 277 buba nung lir.

2015 küm iba tarensen mezüngbuba jenjang nung

Mysuru yimti liasü saka takümbo iba yimti jenjang pungobuba nung ang adok, iba sülen jenjang trokbuba nung Tiruchirapally yimti aser tenetbuba nung New Delhi Municipal Council lir.

Iba osang ya tanü Urban development Union Minister, M Venkaiah Naidu-i sangdonga liasü.

Iba survey nung West Bengal nung aliba yimtitembo maden, kechiyong Chief Minister, Mamata Banerjee-i aniba sorkari Swachh Survekshan nung shilem magi.

Taküm küm iba tetoktepba nung item telemsa nungi repranga liasü: open defecation free, jana bendena intokba, shisaliok aser capacity building nung mark shilem 45, Field inspection nung mark shilem 25 aser sensotemi telangzüba agütsüba nung mark shilem 30 liasü.

Kasa survey ajanga ashiba agi, linük nung memerüktiba yimtitemji Uttar Pradesh nung yimti pezü, Bihar nung yimti ana, Punjab nung yimti ana aser Uttarakhand o Maharashtra na nungi yimti kaka liasü.



Ranchi, May 04, 2017: Jharkhand Police aser 158 Battalion, Central Reserve Police Force (CRPF) sepaitem senteper mita aodang Lohardagga district (Jharkhand) nung prangpong den raraba oset balala aika apuba tanü Ranchi nung police-i sayaba noksa nung angur.

## Sonia Gandhi-i Mulayam aser Lalu na den Tir election atema jembi

**New Delhi, May 04 (Agencies):** Taruba Tir election nung opposition party tem longjemer candidate ka shimtsü atema maparen tenzüka Congress Tir, Sonia Gandhi-i Samajwadi Party lenir, Mulayam Singh Yadav aser RJD tongti lenir, Lalu Prasad na den phone ajanga iba onük jembiogo.

Sonia Gandhi-isa Trinamool Congress aser West Bengal Chief Minister, Mamata Banerjee den Bahujan Samaj Party tongti, Mayawati nata ajurutsü sentong lir.

Congress tatong Tir, Rahul Gandhi-ia Samajwadi Party tongti lenir, Akhilesh Yadav ajurua Tir election atema jembiogo.

Yashi-a National Conference Working President aser taoba mapang Jammu & Kashmir Chief Minister, Omar


Abdullah-i Sonia Gandhi lar kidang ajurua iba election atema jembiogo, ta party osang ka ajanga metetdaksü.

Congress otongdar, Randeep Surjewala-i, "Onok tangatetba agibo, linük taginübaji tama südaktsütsüla, aser Tir den tatong Tir menden atema linük temzüngtem aser democracy wazüka yutettsüpur nisung ka shimtsüla," ta metetdaksü.

"Tir office akhümket wazüka yutettsüpur tasütait ka Tir shimtsüla. Linük taginübaji tama südaktsütsüla," ta Congress otongdarisa ashi.

Taoba ita nunga Bihar Chief Minister/Janata Dal-United Tir, Nitish Kumar, Communist Party of India lenir, D Raja aser Communist Party of India-Marxist General Secretary, Sitaram Yechury nungeria Tir election onük nung Sonia ajuruogo.

## India-i Agni-II Ballistic Missile takok ngua tendangogo



**Bhadrakh (Odisha), May 04 (Agencies):** Brihostibar anepdang 10:22 ako nung Odisha, Dhamara nung aliba A.P.J Abdul Kalam asetkong nung India-i Agni-II Ballistic Missile takok ngua tendangogo, ta osang ka ajanga metetdaksü.

Tamalenbo A.P.J. Abdul Kalam Azad Island dang ya Wheelers Island ta jaa liasü. Iba nuclear missile ya

kilometer 2,000 tashi khadoktettsü.

Meter 20 talang Agni-II missile ya stage ana- solid propelled ballistic missile lir.

Iba missile touzük ya ton 17 lir aser kilometer 2,000 tashi seret 1,000 bentettsü.

Agni missile series ya DRDO-i yanglur aser iba ya nuclear tashi aliba kidanger linüktem anema yangluba lir.

## Election Commission-i May 12 nü party ajak senden ayonger

**New Delhi, May 04 (Agencies):** Election Commission (EC)-i May 12, 2017 nü party ajak senden ka ayongogo, aser iba senden nung electronic voting machines (EVMs) nung timtem aliba onük lemsatepsü.

April 29, 2017 nü EC-i, EVMs ji raksaa amshitsü makok ta yimtenren party tem nem angatetdaksütsü atema parnoki party ajak senden ka ayongzüksü, ta metetdakja liasü.

Osangbenertem den jembidang Chief Election Commissioner, Nasim Zaidi-i,

EC-i taruba election tem nungbo Voter-Verified Paper Audit Trail (VVPAT) amshitsü sentong lir, ta metetdaksü.

"VVPAT alitsü atema onoki senotsü nguogo. Onoki VVPAT lakh 15 den PSUs ana Bharat Electronics Limited (BEL) aser Electronic Corporation of India (ECI) mangaogo," ta Zaidi-i ashi. Zaidi-isa, VVPAT machines lakh 15 ji 2018 küm September ita tashi nungbo angutsü, ta metetdaksü.

Polling station ajak nung VVPATs amshiba mezüngbuba linükji India akumtsü.



Mosul, May 4, 2017 : Iraq sepaitemi yirur aliba nisung ka anitetba noksa nung angur. Apu khen atema shibanga ayuba sülen pai Tigris ayong military rong ka nung ajanga aru.

### Russia, Turkey aser Iran linüktem Syria kümzüka ayutsü sign sütep

**Astana, May 4 (Agencies)** : Astana nung Damascus yimsüsürtem aser Syria nung opposition telok na ceasefire olemtep akaba sülen Brihostibarnü Russia, Turkey aser Iran linüktemi Syria nung lendong maliba tesem mesemteta ayutsü asoshi tenangzüktepba ka sign sütepa yuogo.

"Astana nung yimyjung olemtep akaba ajanga item linük asema iba tenangzüktep nung sign asü," ta Kazakhstan Foreign Minister, Kairat Abdrakhmanov-i ashi.

Syria opposition telok nungi züngsem anabo iba senden nung Iran adenba ajanga medeni ao, ajisüaka parnok

telok nungi timba ka iba sign asüba sentong tema aden, ta osangbenertemi metetdaksü. "Iran-i iba tenangzüktep nung sign asütsü temeten mali kechiba süra parnokji lendong agütsür linük ka lir," ta opposition züngsem kati ola tulu adoka Abdrakhmanov o tejembidak nung jangajunga arongloksü.

Iba tenangzüktep nung sign asüba sülen Syria sorkar telok nungi tekolakba, Bashar al-Ja'afari-i parnok anemer kati arongloksübaji tongtibang masü ta ashi aser parnoki Iran aitsübaji o agi jembirbadang ta shisem.

Russia telok nungi lenir Alexander Lavrentiev-i, ibai

lokti ka inyakyim nung mashi malu sayuba mapa lir, ta ashi.

"Iba ya ajanga nija mulung nung bilemba temai adokba aser opposition inyakyim nung tashi maitba sayur," ta Lavrentiev-i ashi.

Pai, Syria sorkar nungi züngsemtemia temulung shiranga bilemba jenti lir, ta shisem.

Abdrakhmanov-i, Astana nung pungububa olemtepji July tiyong nung akatsü saka ibaji masü tsüngda Ankara nung senden ka akatsü, ta sangdong.

Syria asoshi UN nungi atakteta arusang, Staffan de Mistura-a iba olemtep sentong nung tendar.

### Somalia:Kilonser rongnung tanubusang khasetogo



Abbas Abdullahi Siraji

**Mogadishu, May 4 (Agencies)** : Brihostibarnü Somalia security force temi linük kilonser rongnung tanubusang, arishi küm 31 tain, Siraji kiralongrar ta aibenlener

khaset, ta ketdangsertemi ashi. Abbas Abdullahi Siraji ji February 8, 2017 election sülen akümba Somali cabinet tasenba nung aliba kilonsertem rongnung tanubotisansang liasü, ta osangbenertemi metetdaksü. Bodhbarnü guard temi telungpur indang gari ta temulung melemi bilemer akhaba mapang Minister of Public Works & Reconstruction, Siraji mener oyaa aliba gari nung akhadang pa khaset.

Somali Tir, Abdullahi Mohamed "Farmajo" Ethiopia semdangi aotsü liasü saka ajungben iba asü lendong ajuruba ajanga athi aser

Brihostibarnü linük yimtiba nung agitsü aliba kilonser tasüsang asüpila sentong nung adentsü ta metetdaksüba linük radio osang nung sangdonga liasü.

Kilonser Siraji khasetba nung densema aliba sepaitem ajunga aputsü Tir-i tetuyuba agütsüba sülen guard parnok pezü tashi pua lir, ta linük nung osangbenertemi ashi.

Siraji ya züngsem 25 agi akümba sorkar tasenba rongnung dena liasü. Iba cabinet nung tetsüra parnok trok dena lir. Somalia Sorkari rara ajanga teraksa adokba, kiralongraba aser ayawara nokdangtsü asoshi bendanga agüja inyaksü telemtetba agir inyaker.



Sofia, May 4, 2017 : Brihostibarnü Bulgaria Ato Kilonser tasenba Boiko Borisov aser cabinet züngsemtem parliament nung tenangzütkep agiba noksa nung angur.

### Saudi nung tetsür nema sorkar mapa inyakdaksütsü

**Riyadh, May 4 (Agencies)** : Saudi Arabia Chuba Salman bin Abdulaziz Al Saud-i Brihostibarnü sorkar ketdangsertem dang tetsürtema tsüraburtem dang nungi temelaba memeshii sorkar mapa atema tenüng agütsüdakjang, ta ashiba osangbenertemi ashi.

Saudi Arabia nung tetsürtem sorkar mapa bushiba mapang lar tsürabutem nungi temelaba shidi ka nüngdaka liasü.

Islam tamangba yimsü den

apet mapet asadangtsü asoshi ita asem tsüngda nung tetsürtemi inyaktetsü mapatem terensena züludentsü metetdaksüogo, ta Sabq osang ajanga metetdaksü.

Iba sangdong nungji tetsür mapa inyakerem nem parnok oli aruli jajatsü asoshi nüngdakba gari peria agütsütsü shia lir.

Saudi Arabia tsürtem nem gari manishidaksür aser ibaji ajanga parnok aika mapa angutsü timtem alur mesüra parnoki mulungba ama alitsü makoker.

### Pakistan nung telungpur 3 tasüba agi merenshi

**Islamabad, May 4 (Agencies)** : Pakistan nung military okadaki obendang agütsür aliba telungpur tesashi asem tashi tasüba agi merenshiogo, ta Brihostibarnü Inter-Services Public Relations (ISPR) sangdong ka ajanga metetdaksü.

Military media wing-i ashiba agi, item kiralongrartem yagi tai maketba nüburtem tepsetba den sepaitem aser sorkkar mapa inyakerem amak.

Hussan Dar, Umer Zada aser Hazrat Ali nunger ya Tehreek-e-Taliban Pakistan (TTP) nung züngsema lir aser

parnok ket nung tapoktsü bener lia apu.

Item kiralongrartemi okadak parnok tai nangzükba sülen parnok tasüba agi merenshitsu obendang agütsü.

Pakistan nung nisung pezü tasüba agi merenshir anogo ka sülen par asema tasüba agi merenshi.

Kiralongrartemi December 2014 nung Army Public School, Peshawar amakdang tanur timba dener nisung 150 dak tema tepsetba sülen linük temzüng yanglushir iba okadak tesem lapok.



Vatican City, May 4, 2017 : Pope Francis-i Myanmar State Counsellor, Aung San Suu Kyi May 4, 2017 nü Vatican nung agizükba noksa yangi angur.

### Iraq: Mosul tanaben meyipa agitsü asoshi inyakyim tasen tenzükogo

**Baghdad, May 04 (Agencies)** : Iraqi security force temi rara agi teraksa jenti adokdaksür aliba Mosul yimti tanaben meyipa agitsü asoshi Islamic State (IS) anema mita aoba inyakyim tasen ka lapokogo, ta Brihostibarnü osangbenertemi metetdaksü.

Army 9th Division aser police nungi Rapid Response Force na lokteper tang Musharifa, Kanisa aser Haramat district temi anüdoklentip tsütsü nungi idar, ta osang ajanga ashi.

Parnoki anüolentip tsütsü nungi aitba sepaitem den lokteper iba yimti tonga aitsü.

Deobarnü Army Chief of Staff Lt Gen Othman al-Ghanmi-i, telungpurtemi sashia nokdangaka hopta asem

tsüngda nung anüolen tsütsü rara ka tembangtsü, ta metetdaksü.

Iraq nung Islamic State telungpuri amanglemer aliba yimtiji joko Mosul ya dang lir aser iba tesem ya October ita nung sepaitemi kanga sashia khen makogo.

January ita nunga ano US-i aniba teloki anüng nungi amakba tayimtsütem aser military shisalen tuyurtemi nungita Mosul anüdoklen tesem tesadang ka agia ao aser February ita nung anüolen agi.

Mosul tanaben meyipba agitsü asoshi tenzükba sülen civilian 580,000 talidak makai prokshioogo aser parnok rongnung nisung 419,000 bo Mosul anüolen alirtem liasü, ta Iraq ketdangsertemi ashi.

Class I nungi VIII tashi Hindi agitsü benokba SC-i magizük

**New Delhi, May 04 (Agencies):** State aser Union territory tem nung Class I nungi Class 8 tashi kaketshirtem ajak Hindi agitsü atema temepishiba ka benokba Supreme Court-i magizük.

BJP indang Delhi chapter otongdar, Ashwini Kumar Upadhyay-i benokba temepishibaji tanü Brihostibarnü Chief Justice of India, J S Khehar-i aniba bench kati angadanga liasü.

Iba bench nung züingsem anaji Justices D Y Chandrachud aser Sanjay Kishan Kaul na lir, aser bench-i, "Tanga oshi jembirtemia, kechiba parnok oshiji (school tem) nung mesayur ta asüngdangtsü. Iba onük atema sorkari inyaksüla," ta ashi.

Bench-isa Upadhyay dang, iba temepishibaji meyipa agiang, ta ashi.

"Onoki iba onük nung kecha mashitsü. Nai ibaji meyipa agiang," ta ashi.

Temepishiba shidi nungji, "Karnataka, Andhra Pradesh aser Tamil Nadu ama Hindi oshi mejembiba state temi akhangba nung ajemdaker Parliament-i 1968 policy yanglua liasü, ajisiaka item state ajaki tanü tashi 'three-language formula' nung manidaker," ta shia lir.

Hindi jembiba state tem nung, tamalen regional oshitem nung school/college azünger sorkar mapa inyakerter aser High court tem nung obendangertem atema Hindi oshi jembitsü, azüngtsü mesüra zülutsüji kanga tasak, iba yongji nüburttem junga metenzükteter, ta temepishiba shidi nungjisa shia liasü.

7 Assam Rifle-i NSCN (IM) aser

(R) telungpurtem apu

**Dimapur, May 04 (TYO):** Tashiyim amshia sen saruba osang angashiba sülen HQ IGAR (North) kübok 7 Assam Rifle temi Kiphire jila nung 2017, May 02 anogo Mobile Vehicle check point ka amenloker mita bushi.

Iba mapang ozüing alema injang aser tashishitsü aliba kakettert bener nisung ana apu. Tena ya Kiphire nung Sikiur (A) yim nung alir Yansunimong Tikher'er jabaso arishi küm 41 tain, NSCN (IM) nung SS Capt Y Wongtsu Tikher aser Seyochong yim nung alir Atobi Sangtam'er jabaso arishi küm 28 tain, NSCN (R) nung Rajapeo Yangtsapa Sangtam, ta jangjaogo.

Tena ket nungi AK 47 injang 10, 7.62 mm SLR indang injang 5, sen 6,090, Mob Intex ka, tashishitsü aliba kakettert aser Motor Cycle Bajaj Platina NL-07 J-0960 ngutet.

Tena den osettem ya Kiphire Police Station nem agütsüogo, ta HQ IGAR (North) indang PRO, Lt Col Amitabh Sharma-i sangdong ka ajanga ashi.

### METONGSHITSÜR

Tir Yimiyim adok 194, May 4, 2017, tapak 11 nung Pelaba Lemsateper "12 Buba Watsü Mungdang.." ta alibaji "21 BUBA WATSÜ MUNGDANG..." ta tazünger melenshia züngdaksüner. Aibelenba atema sasar.

## PELABA LEMSATEPER



Asür RONGSENCHILA PONGEN

Tasoba anogo : 18-05-64

Asüba anogo : 27-04-2017

Onoki teti meima aliba asür Rongsenchila Pongen asüpila sentong 25th April, 2017, anogo nung shimokisa sarasadem, nübu aser rongsen agi yariogo, nünok ajak dang pelaba lemsateper.

Maneni, DABA Pastor-i asüpila sentong aniba, Dimapur Changki Fellowship aser Merangkong Union nungi asüpila sentong nung arua adenba asoshi pelaba lemsateper.

Nenok ajunga dangi arua onok tepela melemsatetaka asen Tulusang Tsüngremi nenok ajak moajang ta onoki sarasademtsür.

- Kinüngertem

## PELABA LEMSATEPER

Meyimlaba lendong tulu April 30, 2017 nung ozü temeim jabaso asem **Asür Kenyangluba Imsong**, tebu tenüing Opanngtemjen, **Asür Limalepzük Longkümer**, tebu tenüing Rangpenmar aser **Asür Limakümba Jamir**, tebu tenüing Alemnüngsang, Chumukedima Police Gate aser Patkai apu tsüngda nung mejangjatetba nisung kari gari agi tsüksetta yutsür ajenba mapang nung kija, kibong, Arogo, lokti balala, shirnokisa taküm, nübu, rongsen, mapang, shisatsü aser sarasadem agi molungsoa yariogo, nenok ajak dang asür kibongtem aser kinüngertemi temulung taroktiba nungi pelaba lemsateper.

Talisa Dimapur Traffic Police Zone I & II, Commissioner of Police-i anir mapang tatsüka tsüngda nung jena aoba gari pua arutetba asoshi kangasa pelaba lemsateper. Ano maneni gari anisang yakta pua arutsü mepishir.

Nenok ajak tenüing aser telok tetshia iba osangkaket nung madoktsütetba asoshi sasaa bilemer, saka Teyanglur Tsüngremi nenok mapa tajung ngua ali nung, maneni nenok taküm aser tenzükba maojang ta sarasademtsür.

- Asür kibong asem kinüngertem.

## AONG REJU SPORTING ASSOCIATION

Mopungchuket

Result Declaration of Raffle draw

Date of draw 2nd May 2017

1st prize - SL no. - 2397

2nd prize - SL no. - 211

3rd prize - SL no. - 1360

Consolation prize : SL no. 3551, 1437, 3124, 2593, 3691, 1376, 3807, 2166, 2649, 1382

## Pelaba Lemsateper

AO SENSO TELONGJEM DIPHUPAR(ASTD)

May 2, 2017 nü Local Ground, Diphupar Village nung Moatsü Benjungmong mapang Wb. S.I.Jamir, Advisor, Urban Development, Govt of Nagaland aser Wb. Limasunep Jamir IPS, Commissioner of Police, Dimapur nati arua shilem tulu agiba den senotsü tenla agütsüba asoshi kanga pelaba ASTD-i lemsateper. Ano maneni kija, lokti tentet aser kin balala nungi arua shilem tajung agiba den külemi senotsü tenla agütsüba, Arogo aser achayangertem teyaritep ajanga iba benjung takok nung tembangdaksüba asoshi ASTD-i pelaba maneni iba sangdong ajangasa lemsateper.

Sd/-  
**LATONG PONGEN**  
PRESIDENT  
ASTD

Sd/-  
**A AKUM LONGKUMER**  
CONVENOR  
PLANNING COMMITTEE


**Molungtok Welfare Society Lucky Draw** koba May 5, 2017 nü adoktsü liasü, ibaji koda masüba süngpang ka ajuruba agi mapang shidak nung madokteter. Anungji iba asoshi nemjema melidaksüner.

Iba Lucky draw October 25, 2017 nü adoktsü ta Society tir ajanga sangdonger.

## Molungnen O

15.01.1934 - 26.04.2017

Kodanga mamatetba temeim Obala asür, **W. Nungshi Aier** (Longjang) shirangba mapang nungi tasüba anogo tashi Arogo aser lokti balala, kija-kibong kwikati nübu, sarasadem, rongsen aser shisatsü agi yariogo, nenok mapa tajung asoshi tepela lemsateper. Tulusang Tsüngremi nenok ajak moajangma ta sarasademtsür.



Temeim Kinungsü, Chirur aser Kinüngertem.

## Pelaba Lemsateper



ASO : 1942

ASÜ : 30.4.2017

Onoki teti meima aliba asür, **Marshiba** (Merangkong) Yimyu Ward Mokokchung, pa mapang tatsüka shiranga aliba mapang nungi tasünü, April 30, 2017 tashi ozü den kija, kibong, kiyonger, lokti balala, Arogo, yimten aser medemertem ana aser talang nungi shirnokisa rongsen, nübu aser tamang sarasadem agi yariogo, nenok ajak dang kanga pelar.

Tsüngremi ozü kibong den yariteper ajak moajang ta ozü sarasadem.

- Temeim Kinungsü, Jala, Jabaso, Semchirtem & Kinüngertem

## MOKOKCHUNG NUNG DOKAN AYOKER

Tents, Chairs, Flowers, Utensils aser Wedding nung amshitsü oset balala.

Taliner lira Contact No.

9862140743 / 9862370793

## ACKNOWLEDGEMENT

Aor benjung tuluba, Moatsümong May 2, 2017 nü Lirmen yimdam kanga mera keta mongtetogo. Iba sentong takok tulu ngutettsüsa teküboklen agüja aliba kija-kibong aser lokti tentet balala shirnoki nübu den senotsü aser lenmang balala agi yaritepogo, nenok ajak dang Organising Committee aser Lirmen Village Council-i kanga pelaba lemsateper.

- |   |  |
|---|--|
| 1. Dr. Benjongliba Aier, Parliamentary Secretary, CAWD & Taxes.                   | 11. Sashi and Asen.                        |
| 2. Er. Lanu Longchar. Executive Engineer, Irrigation & Flood control, Mokokchung. | 12. Takumtsü Ayong.                        |
| 3. Shri. Temjenlemba. Cartographer, Soil & Water Conservation Kohima.             | 13. Nokpu Village council.                 |
| 4. Shri. P Meren Longkumer Retd. SDEO.  | 14. Saring Village council.                |
| 5. Shri. Imkong Longkumer. Account Officer, Deptt of Rural Development, Mon.      | 15. Aonokpu Village council.               |
| 6. Shri. Aliet Hansing . Jt. Director, Deptt of Agriculture.                      | 16. Yajang B Village council.              |
| 7. Shri. Lanu Imchen. SDO (PWD) Longchem.   | 17. Yajang C Village council.              |
| 8. Shri. I.Kumzuk Longkumer.(Kohima)  | 18. Tsuremen Village council.              |
| 9. Shri. Sakumongba Chungtia.   | 19. Akumen Village council.                |
| 10. Shri Limayanger Aier.   | 20. Akumen Village Arju.                   |
|   | 21. Longchem Adhoc Town Committee.         |
|   | 22. Lirmen Pati Olangoin.                  |
|   | 23. Lirmen Arju.                           |
|   | 24. Lirmen Watsü Telen.                    |
|   | 25. Lirmen Student Conference.             |
|   | 26. Lirmen Baptist Church.                 |
|   | 27. Lirmen Baptist Church. ( Women Deptt.) |
|   | 28. Lirmen Youth Department.               |
|   | 29. Japukong Youth Organization.           |
|   | 30. Japukong Students Conference.          |

Talisa, Committee-i shilem agir aser tamang sarasadem den iba sentong takok angutsüsa nungiter ajak dang pelar. Tsüngremi nenok ajak tali moajangma.

Sd/-  
**(Imchasangba)**  
Convenor  
Lirmen Moatsü Festival 2017

Sd/-  
**(T. Kirem Longkumer)**  
Chairman  
Lirmen Village Council

1buba Victor North-East Masters (Veteran) badminton championship tenzükogogo



Dimapur, Nagarjan nung May 4 nü Lok Sabha MP, Neiphiu Rio-i 1buba Victor North East championship lapoktsüba mapang tangokba noksa nung angur.

**Dimapur, May 4 (TYO):** Kuda (Nagarjan) Youth Badminton Stadium nung 1buba Victor North-East Masters (Veteran) badminton championship lapoktsüba mapang Lok Sabha MP, Neiphiu Rio-i ashiba agi, India nung cricket sülenbo nüburtemi kanga sapua asayaba asaya rongnung badminton yaa ka lir. Maneni Asian shilu pur ya iba asaya asayatsü asoshi 'physical structure' aser 'reflexes' tajung lir anungji North-East nung aliba nüburtemi iba maangka ya takok tashi amshitsüla.

Rio-isa ashiba agi, Asia linük China, Japan aser Indonesia amalatem alima ajunga nung badminton asayaba nung temaba jenjang nung lir aser India-a jenjang 9buba nung lir.

Victor Company-i iba asaya NE nung ajungketba asoshi

tenüngasangba den külemi veteran asayartemi iba asaya jenjang temabai ajungkettsü asoshi lanurtem ajungmosotsü ayongzüik.


MP-i maneni Nagaland nung lanurtem asaya nung anitetsü asoshi veteran temi badminton academie balala amenloktsü imlaba lemsatop. Yimten yimsüsüba, rara balala aser tamangba yimsü balala ajanga nüburtem tsüingda nung telemsa adokdaksür, saka asaya ajanga item ajak toktsür telongjem dang adokdaksür, ta paisa ashi.

Deputy Commissioner Dimapur, Kesonyu Yhome iba asayamong ayongba Committee nung Convenor lir aser pai iba asayamong ajanga North East nung iba asaya ajungketba dang masü saka nüburtem tsüingda nung telongjem tali adokdaksütsü imlaba lemsatop.

Iba asayamong nung Arunachal, Assam, Manipur, Meghalaya, Mizoram aser Nagaland nungi asayartem shilem agitsü asoshi züngoksemogo. Nagaland nungi dena national umpire 5-i iba asayamong achaayangtsü. Arishi küm 35 nungi tenzükä asaya telemsa 7 tashi lemsar asayatsü.

NE state tem nungi asayar telok 92 iba asayamong nung shilem agitsü aser GHSS badminton auditorium nunga asayatem asayatsü.

Asayamong lapokba sentong nung Pastor, Khriezovi Kiso-i temoatsü meshia sarasadema tenzük aser Sinya Kath-i ken ka aten. Iba sayamong ya Victor-i sponsor asür aser Nagaland Badminton Association kübok Dimapur District Badminton Association-i achaayanga amonger.



**MAY 05, 2018 ASAYA**  
Bangalore **VS** Punjab - 8:00 PM

**MAY 4, 2017 ASAYA OSANG**  
Delhi-i Wickets 7 agi Gujarat akok.

Oorja-CAPF U-19 asayamong anogo 4buba osang

**Kohima, May 4 (TYO):** HQ IGAR (N) kübok 9 Assam Rifles-i ayongzüikba, Nagaland State League "Oorja - Central Armed Police Force (Oorja-CAPF) U-19 football Talent Hunt Tournament anogo 4buba asaya osang yamai alitsü:

*IG Stadium nung tetsürtem asaya osang:*

1. Christ King HSS Kohima-i Bayavü HS Kohima 5-0 agi akok. Asaya nung gaol agütsürtemji; Vilakhonuo-i (10) minute 5, Reena Rai-i (11) minute 25, Vetsutalu-i (7) minute 26, 39 aser 57 nung ta goal agütsü.
2. Soccer Damsels Nagaland aser GHS Khonoma na asaya goal kata magütsü asaya tembang.
3. Girls Sports Hostel Dimapur-i goal 1-0 agi Girl IG Academy madak takok angu. Asaya nung Watijunglai minute 57buba goal ka agütsü.

*Local Ground nung teburtem asaya osang:*

1. State Boys Hostel, Nagaland-i State Sports Academy 2-1 ahi akok. Asaya nung State Boys Hostel nungi asayar Latminlal-i (21) minute 32 aser Bapen-i (19) minute 51 nung ta goal kaka agütsü.

State Sports Academy puri goal ka agütsübaji Purakumi (11) minute 78buba nung agütsü.

2. SAI - STC Dimapur-i 6-0 agi KV Dimapur madak takok angu. Goal agütsürtem yamai alitsü: Neikedozo Tsira-i (9) minute 18, 22 aser 61 nung; Monton-i (14) minute 55; Temsunungsangi (7) minute 60 aser Heichihang-i (13) minute 64 nung ta goal agütsü.
3. Christ King HSS Kohima-i Don Bosco Kohima 2-0 agi akok. Ruovizhalie-i (16) minute 33 aser 36buba nung ta goal agütsü.

**May 6 nü semi final asayatem yamai alitsü:**  
*IG Stadium nung tetsürtem asaya:*

1. Sweet Poison Club, IG Academy vs Young Girl IG Academy @ 10am
  2. Girls Sports Hostel Dimapur vs Christ King HSS Kohima @ 2pm
- Local Ground nung teburtem asaya:*
1. State Boys Hostel, Nagaland vs Christ King HSS Kohima @ 10am
  2. SAI - STC Dimapur vs State Sports Academy @ 2pm

FIFA Rankings: Küm 21 sülen India nunger Top 100 tongogogo

**Zurich, May 04 (Agencies):** FIFA ajanga football asayar linüktem züngdangba Bresthibarnü sangdongba nung temelenshi aika melie Brazil temaba jenjang nung aser India jenjang ka melenshia 100 nung lir.

India nunger tebur football asayar telok-i jenjang 100 tongtetba ya küm 21 sülen ataloker.

Nütsüng yongsük billion ka dak tali liaka India nungeri cricket nung dang tali temolung agütsüba ajanga tanga asayatem nung terenlok kangabo melie aru. India nunger football asayar telok ya 1996 küm jenjang

94buba ngutet aser aji India nunger asoshi FIFA ranking nung jenjang tajungtiba lir.

March 22 nü Phnom Penh nung 'friendly' asayaba mapang India-i 3-2 agi Cambodia madak takok angu aser March 28 nü Yangon nung AFC Asian Cup qualifier asayaba nung India-i 1-0 agi Myanmar madak takok anguba ajanga India telok jenjang tajungba ya tongtet.

India nunger tebur football asayar telok ya June 7 nung Lebanon den 'friendly' asayatsü aser June 13 nung Asian Cup qualifier atema Kyrgyzstan den

asayatsü lir.

India nunger tebur football team-i taoba match 13 asayaba nung asaya 11 koka lir aser item asayatem nung goal 31 agüja lir. *FIFA Ranking nung temaba jenjang 10 nung alirtem:*

1. Brazil
2. Argentina
3. Germany
4. Chile
5. Colombia
6. France
7. Belgium
8. Portugal
9. Switzerland
10. Spain

Paris Saint-Germain puri Aubameyang atema Euro Million 70 agütsütsü renema lir

**Berlin, May 4 (Agencies):** Paris Saint-Germain puri Borussia Dortmund nungi striker Pierre-Emerick Aubameyang alitsü asoshi euro million 70 (\$76.5 million) agütsütsü asoshi renema aliba Bresthibarnü osang ka ajanga metetdaksü.

France nunger asayar yagi iba season nung goal 35 agüja lir. Pai PSG director of football Patrick Kluiwert den Paris nung ajurutepogo.

German osang kaket ka ajanga ashiba agi, Aubameyang aser club na tangatetep kati arutsü asoshi ana nungdang lir.

May 27 nü Eintracht Frankfurt den German Cup final asayaba sülen Dortmund puri PSG nungi offer agütsüba angadangtsü asoshi atadar.

Arishi küm 27 tain Aubameyang-i PSG nung season shia euro million 14 tashi aatsü akok, ta osang ajanga metetdaksü. France nunger asayar yagi Real Madrid nung mesüra Spanish league nung danga asayatsü asoshi jangraba lemsatopa liasü, saka par kibong Paris nung lir.

Pa Dortmund nung asayatsü asoshi kulizüngtepba ano küm asem anunga lir, saka iba season

tatemi pa German club ya toktsütsü akok.

Taoba mapang Germany striker Lukas Podolski-i ashiba agi, iba telemtetba ya Aubameyang asoshi kanga tapet asütsü. "Pa France nungi lir aser pai French jembir aser par kibonga idakji lir, saka pai pa sasa Dortmund nung ama kasa asütsü masütsü ta asüngdangtsüla, kechiyong pa Borussia nungbo kanga nüngtugu lir saka Saint-Germain nung pa amala asayar tajung aika lir," ta Podolski taoba hopta Bild atema column ka nung zülutsü.

EVERYONE FEELS THE PAIN!



Oajm

CONTINENT FAST RELIEF FROM PAIN

A Product of LIVSAV Group  
CUSTOMER CARE:- 0250-6580183

BILEMDANGANG

"Tangar nem tenüngsang agütsüdang ola tashi agi adokang"